



LUCHII (DECEMBER)

2022 | VOLUME
VIII:03

Lenjeter

Monthly Ao Magazine

Trailblazer



69 BUBA AO KAKETSHIR MUNG DANG AKHOYA 2023 *Denzü*

DECEMBER 27, 1994
MOKOKCHUNG AYATAI t.42

Yisu maru tashi t.24

RNLI NO. 76453/2016



₹. 60

Sugar Cookies

Akümla, Kohima

Ingredients:

2 cup- Maida
2 tsp- Baking powder
1 cup- Sugar (powdered)
1 egg
1 tbs- Vanilla essence
Butter

Icing Ingredients

3 tbs- Icing sugar
3 tbs- warm water
2 tbs- cocoa powder

Icing Ingredients ajakji aitepang aser piping bag ka nung inokang.

Yamai Inyaksü:

Step 1: Auso ka nung cream aser butter inokang aser kanga junga meyoktepa maküm tashi aitepang. Talibo taitepma.

Step 2: Step 1 nung renemer akaba nungji egg aser vanilla inokang aser jungunga aitepang.

Step 3: Step 2 nungji Baking powder indokang aser aitepang.

Step 4: Step 3 nungji maida cup 2 yua akabato inokang aser jungunga teka agi ajetang.

Step 5: Step 4 nung renembaji mekongka makümdang cookies cutter amshia noksa balala adoka tilala lensaang.

Step 6: Oven nung inoker 150 degree nung tera merua maküm tashi wangangma.

Step 7: Oven nungji amsangji agiteter külen tema nungji icing renemer akabaji tobur jungunga yanglokang. Tatsük talem nung aser mekongka kümera Christmas mongpu aru meteta achitsü kanga junger.



Osang tajung ka:

Shilem agiang

Pei sasa yanglutetba chiyungtsü recipe dena
December 27 tashi nung Lenjeter den lemsatepang.

Tajungtiba ka shimteta senpet agütsütsü aser January 2023 Adok nung
AKÜMLA KOHIMA tapak nung adoktsü.

Whatsapp: 825 702 9272

Baking aser cooking nung mangatetba lira marendaki Lenjeter dang asüngdangtsü akok.

Lenjeter

VOLUME VIII: 3,
DECEMBER, 2022

EDITOR : Repalemzung
CORRESPONDENTS :
A Puna Lkr.
Wapangnungsang Pongen
Lanu Jamir

MARKETING MANAGER :
Alem Imsong 9862580627 (Dimapur)
Wapang 9366884972 (Kohima)
Tiawapang 9862983463 (Mokokchung)

CONSULTANTS :
Legal : C. T. Jamir
Senior Advocate
Guahati High Court
Kohima Bench, Kohima
Management : Limawati Longchar
Director, IPR (Retd.)
Production : Dr. Tali Imsong

© 2022 Lenjeter. Kaket temeten meka ayur. Publisher dang nungji tezüluba nung temelaba magii iba kaket nung alibatem kecha nunga agizüka mesüra ajizüka amshitsü memelar. Iba kaket nung kechi ocetsa adoker itemji nüngdakba nung amshitsü Lenjeter ketdangseri tashi meka ayur.
(No part of this magazine can be reproduced without the prior written permission from the publisher. The Lenjeter reserves the right to use the information published herein in any manner whatsoever.)

Ocet adokdaksünür lira pelashishia agizütsü. Ocet kar ajanga timtem adokra, iba khuretji ocet züluri abentsü. Metokmeperi kar ajiteta metongshitsüra pela agizütsü.

"Nai Lenjeter magazine ka alia azüngba ajanga asen Ao oshi renoktsü ajungmesor aser angazütsü asoshi lenmang satema lapoktsür." Kanga pelar!

Printed and Published by Repalemzung, Liden Ki, Meriema near Nagaland University Junction, Kohima, Nagaland- 797001 on behalf of Lenjeter and Printed at N. V. Press, High School Junction, Kohima, Nagaland- 797001. Editor: Repalemzung.

Total no. of pages 48 including Covers.

TEMETETTSÜ :

Temeim Lenjeter azüngertem, Lenjeter adokba nung temulung masüba mesüra temelenshitsü repringtetba kar danga lira Lenjeter dangi marendaki agüja aliba nung jembira kangasa pelatsü.

8798876353

Onok dangi züluang

Onok dangi shiang.....

Yangi ocet adokbatem koma bilemter? Ne tangatetba aser melenshitsü pela agizütsü.

(Letter to Editor) Ojang 100 tashi nung züluangma. Ita shia tajungtiba shimtetsü!

E-mail: editor.lenjeter@gmail.com



Pela agizütsü.....

Ne taküm nung ajangshiba tatalokbatem mesüra nai züluba ocet kar lemsatepnüa lira ojang 500 tashi nung zülur agütsütsü akok.

Yamaisa ataloker nung amshitsü atema nai puratetba aser ibaji kaket nung adoka malibatam agitsü. Ojang tenem tashi nung agütsütsü akok.

METETA ALITSÜ KAR :

Tezüluri kechi züludir itemji pei sasa züluba mesüra tangari züluba nungi agizüka zülusema lira kong nungi osangtemji angu itemji jangja sayuangma (source). Ita shia 20 nü tashi nung arubatam nungi adoktsü. Ne tenüng, taliba tesem, postal address, Mobile number aser E-mail tejangja ajenloker yokangma. Nai kechi yoker item ocet kar nungbo zülumen metongshitsütsü akok. Kechi ocetsa adokdir itemji Lenjeter meyang akümtsü.

MAGAZINE ITEM TESEMTEM NUNG ANGÜTSÜ

KOHIMA : • Woodland HandiCraft, Opp. State Library.
• Student's Book Centre, near P. R. Hill.
• M/s Kohima Book Centre, Opp. War Cemetery

DIMAPUR : • Modern Book Depot.
• OM Book Centre.
• Christian Literature Centre.

MOKOKCHUNG : • Balaka Yokya, I. M. Road.
• Classmate
Changtongya Town.

lenjeter@gmail.com @lenjeter_ao_magazine

"Lanuri metetba danga tajungtibaji nusing taini ajangshiba ya lir"

Lenjeter

3

Kaket MULUNG

69 BUBA AKM AKHOYA 2023 PENZÜ

KETA Alibatem



YIM O ZÜLUR DANGI- t. 05

YIM O- t.06

KAKET MULUNG- t.07

SENSAKSEMBA- t.16

ZÜLUMEN YIMYA KAR ANGAZÜKDI- t.22

TESANEM TZÜSÜ: MERANGA ZÜSENTETBA OCHI

RONGSEN- t.23

~S. N. Walling

YISU MARU TASHI- t.24

~P. Renthly Jamir

CHRISTMAS NUNG OZÜ JABASO TANGAR NEM

APUTSÜ!- t.26

PUZZLE- t.28

KINUNGTSÜ ASER KINUNGBU KÜLEM

SANNÜKER MAPA- t.31

~Imnabenla Jamir (Bangrapet)

MISSIONARY Allen Gardiner- t. 34

MECHIMENU KA NUNG AIBELENBA AJANGA ALIMA

NUNG TEMELENSHI TULU ATALOKBA- t.37

TEMANG ANEMA ALITSÜ TESAYUBA- t.40

YAMAISA ATALOKER- t. 41

DECEMBER 27, 1994 MOKOKCHUNG AYATAI- t.42

~T. Senka Ao

TASÜNGDANGBA SÜNGDEN- t.46



69 BUBA
AO KAKETSHIR MUNG DANG
AKHOYA 2023 Penzü
DECEMBER 27, 1994
MOKOKCHUNG AYATAI t.42
YISU MARU TASHI t.42



Yim O zülur dangi



Yimpoksüi adok Tasüngdangba Süngden nung Taochi Kohima nungi tasüngdangba ka asüngdangba nungji teshisadangtsü lia asüngdangogo aser Lenjeteri kanga shisa kaa langzüogo ta nibo bilemer. Government mapa nung tulur aika HoD mesüra AHoD menden bena arur mapa nungi retire asütsü mapang nung voluntary agir mesüra retire sür külen political party nung dena assembly election nung tokteper. 2023 kümjia asen nisung karbo tulur menden nungi tera kara anisüngzüük agir election nung toktepküm, aser aji tangu dang. Telangzüri "aochia aser junga benshiba" ojang amshia langzübaji shisataka o. Asen nisung moru moru agi asüng anungji ka kara ana kanür, pungu kara ter kanür. Tenük kodanga masüngba nübutem asenok. Government mapa inyakdang akok tashi development sen chitsür

iba jagi tenük masüng nungji aika-ti ano yangji tali bendenloktsü atema election nungji tokteper. Tenüksüng maka anungji taoba mapanga, tanga aser yasüra government official mapa nung retire sür politic nung pongsema shilem agitsübaji temetet. ~ Tia, Kohima

P. Renthly Jamir-i züluba TER AGI KA MASHI ya ajaki zügang aser tajangzüük nguang. Ka agi ter ashir nübujibo koda tenüngshitsü, iba jagi asen tsürabur mapang nungi shin o ka agi ter shia ta tetezü jem-bia aru. Kasaji ter agi ka mashibapur tanü asen tendak aika lir. Ocet züluri ashi ama, lenirbo aika, oda teka-bo sünga. Aji oda süaka, pei agitsü metetbapur dang süra aser nübur asoshi tangar den raa jembitsüpur melira pei sasa pei menden nungi alutsü marendaktsüla. Lenir ka mapa agi pei nübur nema medangtettsüsa malitsüla. Leniri benjong nungdang memungnütsüla saka timtem nung pei tetsüng karatsüla. Yamaji mesüra Tsüngrem amsüh nungji pei sasa atsünginer asütsü. ~ Süngit Pongen, Dimapur

Yim O Zülur dangi zülubatem ya pei pei tangatetba nung zülur. Tezüluba kar ajanga timtem adoktsüsa kümra tezülur khuret asütsü.

Lenjeter nung keta alibatem temotsü ngua azüngba kar danga lemsatepnua lira Yim O Zülur dangi zülüangma



YIM O

AKM Yongya

Longkhum yimdak mezüngbuba Ao Kaketshir Mungdang sentepba mapang aonung mezüng sentep nungji lenir Longridangc-hetbai Tsüngrem O ajanga Mungdang mungger yamai ayongzüka jembi, "Iba Aoli tekong ajak nung Tsüngrem o agi melimoka tarutsü lanu asensortem kakat shisatsü nung terenlok tulu ngutettsü mezüngbuba asenoki Tsüngrem akhümtsübua Aoli yangardi." Tamalen asen tsürabur mapang kakat shisatsü jagi kin ka tejakleni anir ta memeteti lia aru. Iba jagiang pei chirnur taktang nung mener shiti azüngba jagi kechi ajangzüksü ta school azüngtsü meyoki aluang meranga ayimtsü ajungshi. Ao limai yimsü tasen bener aruba den külemi British sorkari mangko bushiba anendaktsü. Iba ajanga Aolisanger tenük tera saaka tangar libaliroba ngua iba sülenang kakat shisatsü bushitsü jangra aküm. Ao Mung-


dang ajanga school kar lapokdaktsü saka British sorkari itemji nokdanga ayu. Impur nung Mission School lapokerang Ao lima kakat shisatsü renloka tenzüka agi Aor dang masü Naga nungera aika tashitemeteter adokogo. Kaketshir ishika mulungajemer kanga rongjena Ao Kaketshir Mungdang 1929 küm tenzüker tetsübu aser senchitsü arendaka iba AKM asen tsüraburtemi nongita aru. Par mapang pei tashi yari Aor kaketshir lenmang pipoka aruogo. Tanü lanuputunung kaketshirtemi item lenirtem tsüngnep mamatoktsüla. 2023 küm 69 Buba Ao Kaketshir Mungdang lokti senden Akhoya yimdak January 18 nungi 20 tashi amungdang kaketshirtemi asen tsürabur tangatetba nungji rangloker kaketshir nükjidong angateta amungtsü ayongzüker.

f. sen

Lenjeter Volume VIII:4, January
Adok nungi tenzüka copy ka
nung sen 70 agi ayoktsü jilia
metetdakja atar.



editor.lenjeter@gmail.com

Kakat **MULUNG**

AKHOYA YIM

69 BUBA Ao Kaketshir Mungdang Akhoya 2023 PENZÜ

Kakat mulung cover noksa kibur: Dimapur Akhoya Shisaluyimer Telongjem



Ao Kaketshir Mungdang 1929 kum Longkhum yimdak tenzük. Longkhum Putui Ao lima meimba agi aser lanur anitettsü mangdang tulu nung; ajaklen lendong timtem aser sorkar nungi amokmeren tulu liaka par yimdak Ao Kaketshir Mungdang akatsü agizükba ajanga kaketshir kimungji tenzük. Ao lima yimtsüng tezü ka nung Ao Kaketshir mongsong milen tilakaji tsükloka ayu.

British nunger yimsüsüba kübok Naga Hills tesem ajaklen amokbanger nüburttem maparen sadema meinyaktetba mapang ka kaketshir kimungji mesem. Aor lanur kaketshir aika meliaka tarutsü putu asoshi mangdang tejangja yur Longkhum lushi nung tenzükbaji tesüngmangtsüka lir. Anogoshia külen nungi tenokdangba aruaka kaketshir lenirtemi kaketshir milenji ponger jaja aru. Tetsübo tensa ka nungji Aor lanur kaketshir tuko mulung ajemteper tzüa mesendaktsüi zeb ta kati kati nongiter Ao Kaketshir asoshi timtem arema menden amenteta yutsü. Mezüngbuba Ao Kaketshir Mungdang Longkhum yimdak December 29, 1929 nung walunir tukoi tenzükertemji item ya lir:

Nokdenlemba, Mendenbuba, Waromung Longridangchetba, Tezuluba, Changki Imkongmeren, Longkhum Imtinungsang, Waromung Kitemsang, Changtongya Semradangba, Lirmen Mangyangchetba, Debuia Imnalepzük, Yaongyimsen Sendonglemba, Longkhum Item walunir tuko yagi tanü lanu asensortem nem masadangtetba temoatsü mapa tulu inyakteta yutsüogo. Par

mapang Ao lima school maka Mokochung nung L.P School ka aser Impur nung M.E. School Ao Mungdangi achaayanga ayuba school ka dang liasü.

British yimsüsüba kübok Ao lima kaket reju sadema malepokdaksü aser iba melena yimtsüng nung Arju inyakyim nungang ozüng tesashi benshidakja aru. Alima benjong agi sünger kaketshirtem atalatsüba tensa kaketshirtemi Aoli kaketshir mungdang tenzükbaji tanü asen shisatsü agi mayimjemer. Kaketshir lenirtem tasütait mapaji tanü tanurtemi mamatoktsüla.

Joko kum 93 shi mera mejaoka arudang Ao Kaketshir Mungdang 68 buba tashi yimtsüng balala nung munga aruogo. Langpangkong Tsükong nungi Akhoya yimdak par Kosasanger putu mapang nung sangkum 2023 kum January 18-20 nung 69 Buba Ao Kaketshir Mungdang mungdangti ayongzüka amungtsü renemtagi. Akhoya nungeri AKM ayonga amungbaji ibai mezüngbuba masü. Ao Kaketshir Mungdang 12 Buba December 28, 1947 nungi January 1, 1948 tashi iba yimti nung Ao kaketshir mungdangti mungogo. Iba mungdang kechi koma amung itemji kar tatsüka lur zülua angutsü. Kum 75 sülen ano Akhoya yimdaksa AKM mungtettsüsa mapang tajung ngutetba ya jangratemtsüka aser tenükshitsüka lir. Tejaoker yimkong nübutoka anibelem mesasai Aor kaketshirtem asoshi nüken belem arema inyaktagi. Ya asoshi asenok ajaki peladi aser aruya aliba AKM mungdangti asoshi sarasadema atalidi.

Iba kaket mulung nung Akhoya Yim penzü, aser 69 buba AKM lokti senden achaayanger lenir kar den sensaksemba angutsü.

AKHOYA LIM PENZÜ

Source: Akhoya Senso Mungdang Golden Jubilee Nüingo Kaket, 2017
Akhoya Baptist Arogo QQC, Nüingo Kaket, 2013




16th century nung Ungma nungi Kosasanger Putu yimsüsüba mapang nung Jungli Mongsen tabensai min lenshia Akhoya li mesemtet. Yim tasen yateta mesemtetnü keyi (Mongsen agi akho) ka lepset. Anungji yim tasen akümdang akho ka lepsetba nungi iba Akhoya yim tenüng ya jatet.

Akhoya yim ya Nokinketer, Süpongchir, Tashitawar, Walunir aser Tanishir tajung sotetdak yimkong asünung iba yim dang Nüing-

shi Yimkong, Asüngdang Yimkong aser ano alima yanglusang tsüngrem, Lijabai semdangba lima asüba agi Tsüngrem Sapang ta ajar.

1888 kum Akhoya limai Khrista osang tajung bener aru aser 1890 kum Akhoya yimtsüingi Dr. E. W. Clark arua mitjongkong nung noktaker Akhoya yimtsüng aser nüburttem asoshi sarasademtsüba temoatsü süngjangji tanü Akhoya nungeri dang agir masü Naga





Dr. E. W. Clark Statue

nunger yimkong asoshi temoatsü süngjang atangba asenoki ngua arur.

Akhoya yim anüdoklen Yachem aser Yaongyimchen, anüdoklentip Changtongya aser Merangkong, anülulen Asangma aser Kelingmen, anülulentip Unger aser Chuchuyimlang agi artsü süa lir. Alushi tesadem tzüdi-tzüyong longki peria alidak alumang 66 aser ayong 68 agi yim ayimbanga lir. Akhoya lushi nung item süngjanglijangtem angur: Aitjang, alongjang, arlashi, arem teti, anjungmetsüla, asükpokrem, hungtula, hongshishi, kazüjang, kümsang, liangjang, lozü, melenjang, mesüenakjang, mongmongjang, mesü, metiong, mey-angjang, merajang, mezünglashi, menaklashi, monguzünu, mopongkosünok, nangjalashi, nenkajang,



ongretjang, ozümilashi, okshijang, pongmerek, poshishi, pongrangjang, puerjang, pentsükuerlashi, rüdenjang, sürajang, süngojemben, sükleplashi, süngkongrüjang, shitsülangtemjang, tsümola, tak-taklashi, tsüremjang, tzülaki, tangshi, waküplashi, yangkolashi, zükjem.




Akhoya Nüngshilong

Ango angubatem: tsünger, tsüngko, zütsü, longjak, süpen, ngaya, angolang, mür, jokli, ngürem, tongji, sürolar, ashio, tao, zütsü jangrang, ajang, mezüngu, rüdong, ronghongngu, anget, yangsü, ninak, tepdang, angoponglu, longrü, zür, ngoko, ngaktsü.

Ayong tenüngtem: Akhoya longyang, akhoyatzü, alatzüyong, ajahanglayong, apayuba süngsemyong, arryong, antsüteraben, chuchuyüyong, chitoba ajayong, haluyong, hatsüngyong, imtsük-sangyong, imsen nunger tzübo, imehangba asüyong, janganasü, kiyisayong, koasang, langliyong, lasong, lempakyong, leperyong, longjak apuyong, longlangbayong, longsapangyong, longkitzübu, longkümer tzübu, mangliangba ajayong, merangkiong, men-

emtzüyong, mesanglongyong, moadangbayong, nangpongsotet, nenjayong, ngisadongpanglak, ngupliyong tzübo, ngümmetayong, oboulalongyong, ongerba tzübo, pongjayong, rudenjangyong, shijiyong, shitiyong, shitiasüyong, suityong, süngsakong nung-er tzübu, süranüyong, tangdiyong, telensang, terotoyong, toi, tsüknuangyong, tzülayong, tzüla, tzüpoklang, tzüjemtsüyong, tzümok, tzükümyong, tsüngrem apudong, tzülensong, tzünung, tzütepba tzütatsü, yimkongchiba asüyong, ahongshi.




Osak



Osak anü nung kongka ayur



Kokmo nung osak seter angur



Ano Ao lima nung Osak kanga junga amshia sürem yanglubaji Akhoya nung lir kechiba süra iba lushi nung osak talubosa anguba dang masü osak aremtsü tzüji Warot-zübo koba Akhoya lushi nung lir, iba tzüji tapetba. Kechiba süra iba tzü nung aremba süji sentsüperang keta remteter ta ashir. Tamalen bendanger yim nungi Akhoya yim-dak osak nung sü aremtsü bener aru aser tanga osak nung sü rema bendangli oda international market tashi nung oa ayoker. Akhoya yimdak osak nung sü junga aremba osang angashia 1984 küm May ita nung Gujarat nungi tetsür ka arua iba yimdak ita asem tashi mungzü-ka osak nung sü aremba angazüka ali.

Akhoya ya osak nung sü aremba nung dang masü saka südakmen-dak mapa nunga kanga tajung aser nüngtugu yim ka lir. Nagaland nung teka agi atakba tabentsü sü aser süpeti tajungji Akhoyatsürtemi atakbatem asütsü aser Akhoya nungir teburtem dak süng mapa inyaksü sempet tajung keta lir.

Population Census 2011 nung shia aliba agi, Changtongya Circle kübok Akhoya yimdak kibong 235 nungi nütsünyongzükji 1123 lir. Yimdakji Govt. Middle school ka aser mepu 10 yamai lir- Temshi tekong mepu, Meit Kong mepu, Lent-en mepu, Shitsü mepu, Tsüngrem sapang mepu, Suet lenden mepu,



Lendinokdang Memorial Library Cum Conference Hall



Akhoya Community Museum

Nangpong sotet mepu, Mangkutrong mepu, Lemjem mepu aser Noksang mepu. Akhoya yim Jungli Mongsen külemi aküm saka tongbo Junglir dang lir. Iba yim nung Jamir, Longkümer aser Imsong ta kidong asem lir. Akhoya nungir rongnung mezüng UPSC tatidang ajanga IAS angusangji P. Talitemjen Ao liasü aser tang tashi Langpangkong nungi UPSC tatidang ajanga IAS jenjang ngutetbabo pa dang lir. Pa sülen NCS officer-tem mapa nung lia IAS jenjang an-gurtemji Akhoyatsür Wt. Anenla Sanen aser Watsü Anenla Sato na

lir aser UPSC tatidang ajanga IRS angulaji Temsünaro Jamir aser IFoS angusangji Wb. T. Aochuba lir.

Yimdenren tsütsü reprangdangra, Akhoya nungir Wb. R. C. Chiten Jamir Nagaland akümer rongnung ka aser pa Nagaland government nung Deputy Chief Minister menden tashi inyak. Iba jenjangji tanü tashi nung Langpangkong nungir yimsüsürtem rongnung tematiba jenjang tongtetba asütsü. Saisapong tsütsüa kodang reprangdangdir, tang ya Nagaland Olympic Association nung Senior Vice President aser Nagaland Amateur Boxing Association nung president, Wb. T. Meren Paul aser Nagaland Cricket team Captain Wb. Jonathan Rongsen Longkumer lir. Ano Ao oshi renlokba tsütsü kodang reprangdangdir, anogoshia adokba Ao osang kakat Tir Yimyim kibur aser Yimotir K. Temjen Jamir lir. Paya Langpangkong nungi mezüng Naga Students' Federation (NSF) nung tir liasü. Tsüngrem tenzüba mapa nung alirtem rongnunga tang Clark Theological College (CTC) nung teinyakdak principal ya Akhoya nungir Rev.Prof.Dr. A. Temjen Jamir lir.


Akhoya nungir tetsür aser teburtem ya asojen aser topur tajung, teyakyak, tesasa, tagütsünü aser teyarinü jakla adenba purtem lir. Parnoki Jungli h aser i agi toa jem-

bir. Parnok dak pi den melamelaa metettepa tembar kümnüba aser aiener dang jungnüba shisatsü keta lir. Akhoya lushi nung naring, jemben aser somomo kanga junga tsünüteter. Ano Akhoya nungir tangar dak alia aon tapu ka kanga junga sotetbaji Süngoku aon lir. Imlar iba Süngoku aon ya Ao Ketshir Mungdang mungdangti nung adentsü arurtemi terabosa chishitsü südi.

Akhoya nungir AKM nung mendenbuba/Tir/Tezuluba inyaka arurtemji parnok ya lir:

1. L. Pangersowa (1944)
2. L. T. Yanger (1952)
3. R. C. Chiten (1952) Tezuluba
4. P. Tali Jamir (1969)
5. O. Shilu Jamir (1985)

15 Buba A.S.C Ungma nung September 25-28, 1952 nung amungdang Mendenbuba L. T. Yanger aser Tezuluba R. C. Chiten naprongla ya Akhoya nungi liasü. Ano AKM record nung otsüsütsü kaji, tang tashi nung AKM Mendenbuba inyaka arurtem rongnung tebu aser par jabaso na prongla AKM Mendenbuba ser asen kin anitsü lenisütsü tajung agütsübaji Akhoya nungir L. Pangersowa Jamir aser par jabaso P. Talitemjen na asütsü.



AKHOYA YIMDAK MEZÜNG AO KAKETSHIR MUNG DANG AMUNGBA OSANG TATSÜKA

Source: AKM, Ao Kaketshir Penzü, Golden Jubilee 1929-1979

12 BUBA A.S.C AKHOIA
DEC. 28th '47' – 1st JAN. '48'

Mendenbuba : Imnüksangba
Teyariba : Lipoklemba
Tezüluba : Ayutemjen
Teyariba : Temsüjungba
Sen Kibur : Imkongmeren

Conference pelashishia agizükba Imtimayang Akhoia:- Mapang talangka nungi conference aginüa liasü. Iba conference ajanga onok lima nung tajangzük angutsü imlar. Programme nung 1400 jaok saka 2000 atema renema lir. Mapa kar metokmeperi lishia mejashi-i nenok mapa takok ngua aotsü merangangma.

Langzükba Mendenbuba:- Mapang talangka indoka conference tiptemtsü mapa aika inyaktetogo. Linük mapa aliba agi programme nung adener kar marutet südi, saka tezü medangi asenoki inyaka odi.

Tsüngremi agizüktsü nai inyakang, AJANGTO:- Tamang medeni kecha makok. Alima tanishiri yimden aser science nung temulung agütsür. Mapa kar aser politics jembidang sentep timtemdaksüba kanga majung. Arogo nung kodang meputep adokdir tatsütepba tulu adoker. Tanishir rongnung tekümdangtsü tulu lir. Ka majungba ajanga telok ajak Tsüngrem matsüngdang magizüktsüsa sayangteter. Nai kechiba tatsü ka

maremzüker? Tamang agi talangka aremzüktet.

Yimtsüng merükmejuba, IM-KONGLIBA:- Yimtsüng nung kisüba yimya melenshia merüka alitsü asatsüla. Ki sünglang anak intokba yimya ya dang indoktsüla. Shirurui indokba jana agi asen memenendaksütsüla. Shiruru jana yimdong nung aliba agi zübo ajanga mesen aika temangi ayir. Yimtsüng nung tzübu merüka alitsüla. Tzübuji meyi nung dang sür tsüngküm nungbo rosepba magitsüla. Leper küpok masütsüla, yim kübok aliba majung, tzübu nung inokba mozü Potassium Permanganete mapang shia inoktsüla. Wara lira meyimshia malitsüla. Yim shia tasüba aser tasoba record yutettsüla.

TENLA SEN SARUTETBA :- Rs.164-9-9 p

Temelenshiba Naga lima nung lanurtem shilem – SHILUKABA Inspector:- Iba temelenshiba atongtsü 1929 linük meimeri rongjenseta tenzük. Linük tetezü tulu lir. Alemli asen tanela tuluji British nisungi tepseta liasü. Kin kati lanur dakji teimla tulu lir. Na tashi mait ajanga linük ludaki. 1948 kümi asen nem kechi bena arutsütsü? Iba yagi küm sa küm alentsü. Tang Naga Hills tia tasak lir. Tanü o lir saka asüng mapa ataloktsü. Nagaland noso ashiba timtem nung alidang tanurtemi meyarira nütsü asütsü.

Asen yimya tamajungtem, T.ALIBA IMTI:- Nisung kaka senteper telok ka akümer. Naga kin-a tashi mait jenti lir. Ao kin tasü mait ta tangari züngshibaji tanü

SEN OSANG

1. Tanguba	Rs.336.4
2. Akhoia nung sarutetba	Rs.154.0 P
3. A.M nung anguba	Rs. 296.1.6 P
Total	Rs.785.6.3 P

Ao milen osang- STEPHEN IMTI:- 1.Ao Milen agir 633. Ao lima nung agi 399, Bendanglen 234, taruba Rs.426.

Conference nung temeranger tenla sarutetba ajak agi Rs.633.1.6 P

“T.B tashitak aser iba nungi nokdangtsüba lenmang, O jembir-Dr.IMKONGLIBA:- T.B Symptoms: Aketba, azü meli-i pakla aoba, shiranga aitba, maneni aonung asentzü asenba; item tamaitüsü ita asem mesüra pezü tashi ora lendong lir ta metetang. Temang taret ajema kümra T.B asütsü akok. Shiranga aيتدang maneni quinine anogo 20 tashi chir shirang maneni aitra T.B asütsü akok. Aketdang azü adokbaji dancil awakba agi asütsü akok saka teimba ka T.B nungi lir.”


India nung minute shia T.B agi kaka asür. Noklangshia 60 dak bo T.B lir ta ashir, T.B mesenji tepsettsü kanga tasak. Ghonda 24 anüpo agi dang tep-

settet. T.B aketer metzü nung mesen jenti lir. Mashibang yimya aika nungi T.B adoker. Ki ajentepa anü sangwa mekai aliba nungi, chiyungtsü agi peria machiba nungi T.B adoker.

Tenzüktsü ayongzükba, O jembir-MANGYANGNOKCHA:- Mapang tatsüka ogo pi oshi nung jembira tesüngmang dang süngmang. Nisung den mapa tesütep dang apir inyaktüsüla. Ao kin dang metetba agi Naga kin ajak tejakleni maotsü. Memetetba kin ajungkettsü asen mapa. Khrista dak akanga sotba ajanga lanuri kin aika sangwatsütsü.

Nagatsür Tia, O Jembir- PANGIKALA:- Alemli Nagatsürtem kanga tajemzük nung liakasa parnok dak tasü tait shisatsü agi alima tenzüker-tem nem khunang tetushi agüja liasü. Tang tia tajungba kümogo, shisatsü angazükba kibong yangerba agi aseni kin tenzüktsü akok. Azüngba agi teperi masü inyaktüsüla. Tetsüri tebur den kasa inyaktet nung dang alima melaa intet.

Tayongzükba mapang, O jembir-T.ALIBA IMTI:- Iba putu nung asen Naga kin koba tesem ka nung nokta-ka ali metettsüla. Tangar cooli inyakba agi dangbo alinük tejakleni manitettsü. Bendanger ta asen nübur ta melii tetushi tim agüjang. Lungjemba ajanga dang noktakteter. Amangba yimsü ajanga dang telungjem litet. Asen tzüraburi iba lima ya kümzüka yutsü nungji asenok mapang ya pi nem ben-



er meyoktsüla. Ne kichai Naga kin tejankleni odaktsür ta bilemra aji tamashi lir. Ochi mashiba mapa jenti asenok rongnung lir. Iba ama yimsüsüba agi kin telongi alur.

Asen linük tenzüker Imkongmereni Conference tenzükba anogo nungi asen kibuba mapa nung aser tanga mapa nung küm 20 tashi takok ngua yariba atema conference-i pa nem Certificate ka agüjaa tepela sayu.

Sensaksemba

68 Buba AKM 2020 Khar nung renemba resolution tem koma inyakda arudar?

Ao Kaketshir Mungdang nung Tir ka ama inyaktsü asoshi 68 Buba AKM Inti Mungdang Khar Yimtiba nung amungdang maongka ngutet aser 2020 küm March 18 anogo mapa agizüka maparen tenzüka ao saka alima wara tesashi Covid-19 aruba ajanga maparen kar nungbo tebilemba ama meinyaktettsüsa aküm.

68 Buba Inti mungdang pangzüng tongtibang 10 renema liasü aser item rongnung inyaka arubatem kar yamai lemsateper.

Mezüngbuba nung Ao Kaketshir Mungdangi Survival Mokokchung mapatong nung AKM Tatong Tir densema Luden ka shimer maparen ajak inyaka odagi, anungji iba Survival mapatong takok ngua inyaktettsü asoshi nüburtem ajaki nongittsü kanga nungtaker.

Tanabuba nung Mokokchung Law College temaba jenjang nung ajungketa aotsü asoshi sorkar aser tongtipurtem den takok lenmang ajak bushia inyakdagi.

Ao Kaketshir Mungdang asen tetsü



Nungdokyanger
Tir,
Ao Kaketshir Mungdang

oshi züina aotsü asoshi pangzüng dak ajemdaker alima ajunga tetsü oshi anogo nungtem nung 2022 February 21 nü AKM ayongzüka World Mother Language Day sentong mezüngbuba süa agia liasü. Tasembuba nung Naga yimden ken o aser maparen dak sentakba nung linük tenzükertem ajurua shisalemsatepba mapang agi aser ano Naga Students' Federation dena sentaktepa maparen balala nung tongpo apua inyaka aruogo.

Kaketshir lenir ka ama naia kaketshirtem asoshi kechi onük nung ajemdaker (onük ka/ana) government nem takangba agütsütsü aser kechiba?

Kaketshir lenir ka ama inyaka arudang anguba aser ajangshi-ba nung yabo kechi südir süaka inyaktsü nungtaker ta asüba aika dang lir saka ni yangi kanga tongtibang ana (2) dang lemsateper. Tan tendak nung sorkari yabosa nentaka inyaktsüla ta asüba takangba agütsütsüba.

Mezüngbubaji sorkar school ajak nung tetsü oshi (Ao oshi) tesayur agütsütsüla. Iba ya Primary nungi temaba tashi agütsütsüla, schooltem nung Ao oshibo züngdaksür saka tesayur maliba ajanga tanga subject sayuri Ao oshiji sayur aser aji agi Ao oshi renlokba nung awajema maor, anungji sorkari tesayurji agütsütsüla ta akangtsü.

Tanabubaji Naga yimden ken o maparen ya yakta tembanga Naga nung sadok sadoka alitsüsa atongtsüla ta akangtsü.

Na AKM Tir küm asem inyaka arudang tetsüktaktsü tulutiba ajurubaji kechi liasü?

Ao Kaketshir Mungdang nung tir ka ama kümsük asem tashi inyaka arudang kü den külemi ketdangpurtem, sanen luden, Tribunals, Tsükong trok lenirtem aser luden balala nung alirtem aser ano tejen tenzüker (seniors) ajaki nongita shisatsü, nübo, mapang, sarasadem aser ano pei akok ajak agi yaritepba ajanga mapatong ajak nung tetsükdaktsü makai dang inyaka aruogo. Ya ajak asoshi parnok nem akhüm agüja pelaba shisemer. Talisa teyanglur Tsüngremi masadangtetba temeim agi len aniba ajanga küm asem takok ng-

uteta tembangogo, Tsüngrem nem tenüngsang tetushi tulu agütsür.


2023 nungi tenzüka AKM ketdangpur tasentem asoshi ne tayongzüka kechisa?

2023 küm nungi shirnokisa onok melenzüka inyakdir parnok kija shiai Ao Kin anitsü asoshi iba temulungtetba alitsü nungtaker. Mezüngbuba nung shiba südir süaka pa/lai pei sasa "Ni temsüa lir" ta mulungsentsü taroktiba nungi kuli sütettsü nungtaker.

Tanabuba nung Mungdangti nung pa/la shimdang lokti matsüngdang tazüngkunem agia nangzüka angateta tenzüksüla. Tasembuba nung ochi tanela agi tenzüksüla. Pezübuba nung timtem arema azümesen mesüi tenzüksüla. Pungububa nung Ao Kaketshir kecha tebandang makai liromedem terenlok nung anitsüla. Trokbuba nung mangdang tejanga akatsüla. Tatemsa ajak dak alia Tsüngrem akhümtsüba Ao kaketshir anitsü kangasa nungtaker.

Kaketshirtem ayongzüka olen kar shisemang.

Ao kin mayangsür (Pioneer) ta ajar, saka asen Ao kin dak iba akhüm aser teronemji samaogo, tangari asenok dak tamang makar, aji asünung jokola kakshirtemi tsürabur akhüm magii tarutsü Ao kin tesangwa ka asoshi lanurtem züngkümsüshitsü nungtaker. Lanur aika tangar dang nungi alakteta zünga shiabo metet saka kecha nung tatongokdak makaba nübo aika aremdaka lir. Zünga shia metetba nungji dang temulung lemer malitsüla saka langkabosa inyaktetba mesüra langkabosa purapiloka pei jenjang tangar den medema litettsü tanü putu kangasa ajar.



AKM 2023 Akhoya nung amungtsü Omen kechi aser iba nükjidong ajanga kechi tajangzük angutsü imlar?

69 Buba AKM Mungdangji “Mapaküm Shisaluyim (Education in Praxis)” omen nung ajemdaker Akhoya yimtiba nung amungtsü kanga junga renemdar. Tensa mapang apir AKM ajanga omen/Nükjidong kaka yur mungdangtem munga arur. Tanü asen lima, lanurtem zünger pei azüingba yari mapa mangurtem jenti lir. Iba tebilemtsü khuret ya shisaluyim angazükyim junga mejangjai angazükba ajanga lir ta reprangteta, item lenmangtem nung tesayuba agütsütsü lensayur takotet nübu aikati shilem agitsü, imlar iba mungdang ajanga tangazükba tajung aika angutsü.

AKM 2023 amungtsü asoshi Planning Committee ajanga teintoktsü takzüba senji kwi lezmükja lir (approx. budget) aser yangji AKM Corpus Fund nungi sen kwi enoktsür?

Sentongren tapu balala aser Mungdangtem junga mungtettsüji rongsenketsüng peria ali nungdang jan-gratema aser takok ngua mungteter. Tesüiba AKM nung lenirtemi nukla tajung yur Mungdang amungtsü asoshi senotsü bendentsütsü Corpus Fund Committee kanga dang shisa ka tenteta yutsü. Tanü parnok Committee purtemi kanga meranga inyakba ajanga rongsen peria bendenja lir. Aruya aliba Mungdang amungtsü asoshi AKM office/Official nüngdak nung amshitsü takzütangbaji sen Lakh ter-



Imkongsunep
Convenor,
69 Buba AKM Planning Committee

asem (Rupees Thirteen Lakhs) lir aser sen ajakji Corpus Fund committee-i agütsütsü.

AKM 2023 Mungdang ya taoba mapang dang nungi kechi balaka asütsü?

Tanü alima kanga dang kara ainba putu nung alir, technology tsütsü anogo shia temelenshi aser tangazükba tajung pokteta aser tasen amshitepa aor. Shisaluyim rajema angazükda-ktsüba dak alia, iba Mungdang yabo technology tasen tongtibangsa user friendly apps-tem amshia iba Mungdang mungdaktsütsü teyongyaba lir.

Tejaoker yim (host) nungi AKM 2023 asoshi renemba nungji naia koma bilemer?

Kodang Akhoya Yimtiba nung 69 Buba AKM mungdang amungtsü ni angashi, kü tangi tasüngdangba ka aru aser ibaji, kechi tashi agi Ao lima nung lokti mungdang rongnung tulu-tiba ka yimti nung kilen 200 shi aliba yim ka nung mungtettsüsa ayongzük-

teter, ni kanga süngmanga liasü. Iba mungdang asoshi maparen balala inyaktsü tenzük, kü tasüngdangba ajak to telangzüba ngua liasü. Nüburtem ajak tebong ka küma lungjemer tangatetba teindang, tajungtiba inyaktsü asoshi temlungtetba, rongsen aser nübu mulungsoa tenlaa, bendanga agüja amalitepa yaritepba, tongtibangsa yimsüsürtem kanga dang ajemalua nüburtem asoshi bendanga agüja inyakba angudang kanga temlung achir aser jangra atemer. Tanga mapang amungba ama yimtibo kanga tulu masü, saka ni imlar mungdang munga aruba rongnung tajungtiba ka asütsü amai yongyaseta atatar.

Mungdang ayongzuka olen kar shiang.

Küm asem nung khien kuli küptok sentong ka amai mesüi, iba senden

ajanga alima aser na asoshi kechi tajangzük angur/agütsür iba nukla nung rangloker iba mungdang nung denda-ktsünür. Alima kin ka tangar menepa tejakleni aotsübaji tanü aseni mungdang/lemtet kechi ayur iba dakji tulu-ka keta lir. Asenoki bangpet amai jembir, alima ya lanur lima, saka kodang asangsang nung medemtangdir lanurtem chichiba ayak aser shilem mangur. Ya kechi koda asü? lanurtem kong lir? Taintemi teindang lenmang nung mejajara metongshitsütsüla, aji nenok mapa lir. Tarutsü tiaji tanü junga meinyakra majungtsü ta asübaji nai meteta lir. Kechiba temelenshi tajung bener arutsü asoshi ola madoker, kechiba tasü maiter. Jangyu medema lungjemshir tarutsü anogotem asoshi iba sabang amshia tangatetba tajung nung lemtet tajung agia shilem agitsü lanurtem ayongzük.



68 BUBA AKM 2020 KHAR MUNG DANG KI YAMAI LIASÜ



69 Buba AKM 2023 küm Akhoya nung mungdang amungtsü asoshi yimer terenemshiba koma lir?

Terenemshiji aika dang lir, saka tongti-bangtemji itemi kar lir-

AKM asoshi kibong nung chirnur, tsürabur aser apuani tsüngta tesentak-tep aser yimjung yangluba mapang.

Mungdang den yimya awashi tajung aser nüngdakba mapang ajak nung mulungsoa yaritsü yimya angazükba mapang. AKM asoshi yimtsüng, kibong nung terenlok aser merükmeju mapa inyakba mapang. AKM asoshi yimden, arogo aser lokti tentet ajak den yimjung aser amalitepa inyakba mapang. AKM asoshi yimtsüng aser among atena oa alir yimer ajak kasa khuret bena lungjemba mapang.

Pangdak malir azüoktsü temzüng takang ayuba mapang. Jongdak mapa kar dak alaka Mungdang dak sentakba mapa ajak December tashi nung tembangtsü ozüng. Kibong shia rongdak nüngdak nung amshitsü rongsen rizüngba mapang.

AKM asoshi asen yimeri kechi inyaktsü, AKM asoshi ni kechi inyaktsü ta senso ajaki renemshiba mapang. Tzü, light, oli-ora, metzü meshi aser nüngdak ajak talubusa, mapang magi-i anatiba nung angutsü renemba mapang.



T. Aochuba

Convenor,

2023 AKM Local Planning Committee

Mungdang mapang memetetba timtem, lentong yimti nung mataloktsü saka takok nung amungtsü mechi Tsüngrem leniba meshia sarasadem ayongzükba mapang.

Iba mungdang nung yim balala nungi delegates kwi jaoker?

Taruba AKM mundang nung delegate-temji Aor tsükong trok yimtsüng 74 aser 22 subordinate units balala nungi alitsü aser delegates ajak agi 1500 jaoker.

AKM amungtsü asoshi Akhoya nunger senotsü kwi nüngdaker aser itemji koba lenmang nungisa bendener?

Asen Akhoya nungeri AKM maparentem inyaka aotsü asoshi Local Planning Committee June 2020 nung mezüng meeting mena AKM mapa aser sendongtem tenzüka arur. AKM dak sentakba maparen nung amshitsü asoshi sen Rs.1.50 crore target nung

tenzükogo aser Tsüngremer temaotsü ajanga yimertem tenla, anükapang & well-wishers teyari mapa ajanga target-ji tonga tokogo. Iba den külemi lenmang yangluba, tzü bener aruba, ki asüba mesüra ki olulokba aser kidang osettem aliba (individual expenses) enokra sen crore aika jenjang asütsü.

AKM ayongzükba ajanga Akhoya lushi nung terenlokba kechisa (Development)?

AKM mungdang ayungba ajanga yim terenemshiba tulu lir. Developmentji tapu aika dang lir saka physical developmenttemji itemi alitsu- lemantem yanglushiba, yimten ocettem renovate sushiba, ki tasen asuba mesera yanglushiba, tsu bener aruba, yimtsung aser temeket teborjunga merek teta ayuba mapatemji alitsu.

Akhoya-2023 AKM amungba ya tao-ba mungdang dang nungi kechi balaka asütsü (uniqueness)?

AKM-2023 Akhoya mungdang ya danga mungdang dang nungi balaka asütsübaji item kulitem asütsü-

Yimtisangertem khu khen nokjusangeri tongzüka abenba mungdang ka asütsü, anungji AKM lokti senden ya yimti tulu-tulu nung dang munga arur saka taruba yabo yim tilaka nung amunger asütsü.

AKM lokti senden nung adentsü Akhoya nung sentepertem metette a medemer akümtsü atema-tesem tesem

nung külemi chiyungtsü aser mungdang ki kima anogo shia külemi süngo ajemtsü. Iba jagi, ano, mungdang sentep sentongtema mapang shitak shitak nung tenzüktettsü imlar.


Mungdang ki kima tzükong trok den AKM meyong logo ajenloka aliba lung tulu aser talang tenet azünga alitsü, yangji tarurtem pei-pe i tzükong meyong lung tsüngdang noksa agitsü akoktsü.

Iba AKM mungdang ya plastic mamshiba (plastic free) mungdang ka asütsü.

AKM 2023 mungdang tejaoker (host) nungi tayongzükba kechi ?

AKM mungdang ya yimtisangertemi dang khuret bena aurogo saka yimtisanger khuret tongzüka nokjusanger asen Akhoya yimi mungdang anitsü lir. Anungji yim tilatemia tasüita tarutsü mungdang anitsü mulungtettsüla.

AKM mungdang aika munga aruogo saka taruba mungdang asoshi terenemshiba tajungba nung mungdangertem arudaktsünür. Achi ajem shi pelaba, longsotepba mesüra tanishiba menden raktepba mungdang masü saka Aortem asoshi tajangzük tulu anguba mungdang ka südaktsütsüla, aser aji asen Akhoya nunger sarasadem.



ZÜLUMEN YIMYA Kar Angazükdi



'tok' aser 'dok' amshiyim:

(a) "tok" dak tesütep oti ka süloka zülura, tetezü agütsütetba ojang ka kümteter.

Tat: 1. Ai + tok = aitok

2. süng + tok = süngtok

3. alang + tok = alangtok

4. jen + tok = jentok

5. pen + tok = pentok

6. tok + bang = tokbang

Oren nungi angatetsü-

(1) Pai nüktzü aitok.

(2) Ni yongji tatsüba küma alangtok

(3) Yimdak ki tejen ka pentok

(4) Jana aika ali agi tokbang

(5) Pai merilaji teka agi matok

(6) Aibelener dangji tai matok

(b) Saka "dok" dakbo semlok o 'a' aser 'ma' amshia dang tetezü agütsüba ojang ka akümer.

Tat: 1. a+dok = adok : Pa alu nungi adok

2. ma+dok = madok : Pai ongko ka danga madok.

Oren nungi angatetsü:-

1. Pai tebendenba ongko madok.

2. Antokdangba nung pa dak taiji adok.

3. Na adoktsü asü madoktsü?

'Adok' aser 'madok' tetezü den sentakba ojang nung 'dok' amshitsü. Tanga ajak nung 'tok' amshitsü.

'Dong' aser 'tong' amshiyim:

'Süngdong' tetezü dak sentakba ojang ajak nung 'dong' amshitsü. Süngdong kaji yimya agi ainer, rashia aor aser renloka tedong talangba akümer. Iba süngdong yimya dak sentakba ojang nung 'dong' amshitsü, iba dak alaka tanga ajak nung 'tong' amshitsü.

a) Tat: Süngdong, sendong, ladong, arkhudong, jendong, lepdong, angdong, kongdong, dongben, modong, bangdong, odong, tedong, kendongren, khudong, rangdong, kidong, sangdong. a.a.

b) Tat: Sentong, tsüngtong, atong, matong, metong, metongmetonger, tongnü, tongshi, tonglong, tongtonglatsü, tonglem, tongloksü, tongnüsen, tongpang, tongbang, tongchi, tongjala. a.a.

Oren nungi angatetsü:

1. Lendongi maidang lentong kati lungji tutokang.

2. Sendongji agüjatoktsü sentong kar yangluang.

3. Modongji jungjunga pitetang.

4. Arkhudongi anir tongpangi aotsü.

5. Rangdongji metong nung süklep kwi?

Source : Ao oshi tensenyim, 2022 **L**

TESANEM TZÜSÜ

Iba tapak onük balala nung Adok shia methitemi keta alitsü

MERANGA ZÜSENTETBA OCHI RONGSEN ~ S.N.Walling

Meimchiri meranga inyaker rongsen züsentetbaji Tsüngrem temoatsü lir. Tsüngrem O nungji meranga inyaksü shia lir. Azümesenertem dang meja nungi angazüka meranga inyaksü Laishiba nungi shia angutsü. Meranga inyakdang asentzü ayimer. Asentzü ayimba ya Tsüngrem o ataloktsür. Kechiyong asentzü yima inyaksü Tsüngremi Adam nem atemzüksü. Anungji Adam chirtem ajak asentzü sena inyaksü nüngdak.

Tanü asen tendak asentzü meyimi rongsen bushiba aika angutsü. Asenoki meranga meinyakba nungi rongsen bendenbaji kar akoksaba nungi anguba rongsen lir. Kar akoksatsübaji rakzükrakter. Ochimashi tasa kar inyaka rongsen agibaji ashioktsüba mapa. Alima nung terenlok mapa inyaka nübur ajangzüksü sentong nungi sen mejepzüka agibaji nübur kelakoktsüba.

Mapai moidang, itasen agiba asen nübur rongnung kar lir? Pensioner ka süatokera par adianutemi pension senji odang agiba, tiyazü bill yanglua sen agiba, school nung tanurtem enrollment tai agütsüba, timtemer nem agütsütsü jang, mamatsü aruba ochimeshii amshiba, yimdak yi mayoktsü ozüng yanglur liaka putupuri yi jemer külenang meeting tenzüka amala ochimashi rongsen arishidang alima rajang kümdaktsütsüsa akümer. Rongsen züsentetbaji Tsüngrem temoatsü, saka rongsen arishibaji temenen mapa lir. Akhan-i temakzüka oset nungi, hon, taribi aser süoshi auyaa bener arubaji rongsen arishiba liasü. Rongsen arishiba nungji Tsüngrem terasaba lir.

Asenok ajak pela ajurutepti, kechiba süra pelabaji mezububa temeim mera lir." - Mother Teresa



YISU MARU TASHI

~ P. Renthly Jamir

O nok tanur asü dang atalokba otsü ka, yim ana teti anemtepa aliba joko ali mama tashi melepteptsü ta yimjung lapoka nangzüktep. (Nisung aser yim tenü ng mamshir). Saka yim kabo tebilemba tamajung liasü. Anungji tangar yim kar den senteper parnoki jembia yazüa yimji amak. Aser parnok yimjung lapoka jembidang teti anena chiyunga ajemba yimsüsür kibong koba liasü, künep mesangwadang kishi nung akoshia temba ki lapokang ta ashi. Yimjung tembar asünung ki lapoka lur atua mi apushia alinung tena ateta atsü ng, asenok kodanga meraratsü jembiba to koda ta ashi nung ATO NA ALEPTSÜ jembiba ato ta shir par kinunger ajak lepset. Arju nung asangur ka oa yipa aliba dang kümzü k. Par kidang yimjung jembia chiyungteper senshiba. "Good friend but dangerous enemy" Tsükchir tebang mesepbaji ashioktsüba A.Shin 27:6.

Tang asenok tamang nung Pastor, deacon aser putu yimsüsür kecha tebandang mali ajak temaba jenjang tongteter yimo yim na yimjung lapokteptsü ariteper. Arogoiang tajangraba, Putu yimsüsüriang teyongyaba ta YISU MARU TASHI atema yimjung lapokyonga aoba angur. Tai ajak tokmar joko tai atoktsü maka ta toknyonga YISU marurji ojang ta kazüteper. Saka shin o nungbo tai toktepa ya jenjang tulu ya tapi o


ka masü ta ashir. "Forgiveness is a costly business". Süra Yisu kodang arutsü? Akhidangbo Arogotem sema sayutsü ngirsa aru. Küm 1964 nung onok yimdaki sayutsü ngir Aor tain ka aru. Bodhbar aonung sentep nung Yisu yakta arutsü alima ya küm 2000 A.D. nung tatem arutsü ta pai sayutsü ngi. Onok mapang küm 2000 nung alima ya samatsü tasa jembia. Pa or, Langpangkong Area Bible Class sentep aser tongti o jembir K. Imotemjen Aier aru. Anepdang mezü ng Bible Class sentep senshir ni pa anendak Yohan Pastorbar kidangi ao. Pa 1962 nung onok tesayur liasü. Ni or Pastorba tena kija mena lia sayutsü ngir pai Yisu 2000 A.D nung aruja ta ashia aji shitak arunungbo joko küm 36 dang lir 2000-1964. Pai ashibaji shitak asü tai ta metetnüa ni asü ngdang. Idangji pai aji shitak aji tai ta kecha mashi. Saka tera menürema paibo yamaji ashitsü ta-ang langzü. Aser pai kümsük indang B.C ta A.D ta tenzüker jayonga aruba kodang Historian shiri koba küm kwi shi nungi tenzüker jayonga aru aji tejangja rasa-a ashi. Anungji pa nungi teti atema lesson angazükba mamar. Aser Yisu arutsü mapang tataktet indang metetnüba tobo tayu kümer tanaben sentepi atu.

Onok tanur asü dang Yisuji küm 2000 A.D nung arutsü tasa jembia saka maru. Joko küm 22 süia aor aser dang nübur ajaki YISU MARU TASHI ta bangpet jembir joko nübur aikati matateter kechiyong teyongyaba onsara tulu. Süra

dang ya tasü ngdangba asen lima ajak nung tulutibaji "YISU KODANG ARUTSÜ?" Aser ibaji shibai metettsü? Yisuji Nazaret nung par yimeria koda? Dr Anis A.Shorosh pa Nazaret nung Yirusalem nung pastor 1972 centenary nung o jembir ka liasü paia memetet ta shiogo. Dr.Anis 1972 nung kodang Poona (Pune India) atong Khristian tain tamanger tajung kati question 21 zülur pa dang na Yisu yimer Yirusalem nung alir naibo metettsü. Yisu kodang arutsü? Pa tamasa kong arutsü? Mepet nung arutsü asü? Pa Yirusalem nung anentsü asü, Damaska nung anentsü? Kechiyong muslim temibo Damaska nung tama anentsü ta amanga jembir. Item tasü ngdangba ajak ya Yisu tanaben arutsü atema dang liasü. Anungji pai yakta nai metetnüa yongyaseta asü ngdangba, ni pela-a agizüker saka Kibubai ni mapanglemsaba luden nung meshim. Sakasa teti renema alitsüba luden nungang shim. "The Lord has not put me on time committee only on preparation committee" Meimchir yimya agi tarutsü indang metetnür. France limanungbo "The future is a big business" ta ainkar arasentsür shiner mangdang nung tarutsü tia metetnüa sen dollar billion ka dak tali kümshia entoker ta ashir. Süra asenoki yongyaba Yisu kodang arutsü aji shibai metettsü. Aor Naga nung lai puti nung mongin India rangben nung missionary inyaker, America lima oa inyaker aruba Dr. Rev. Imotemjeni memetet. Yisu yimer Yirusalem nung Pastor Dr. Anis-ia memetet.

Nisungi aginüa yongyaba jagi taoba mapang aser tarutsü indang bushijen bushir. "Men's Curiosity Searches Past and Future" T.S Eliot. Alu nünü tila ka achitsüa pungmang takzüa an tokdang nung Yisu arutsü memetetnürbo shiba

alitsü. Ibajagi tanü putui YISU MARU TASHI ta bangpet jembia inyakteper südi. Ao yim teimba Aenki shibanger alirtem to YISU MARU TASHI atema yimjung lapoka azü ngashia nangzüktepogo. Ya angudang Yisu yakta arutsü südi ta bilemer, onok yimera yim aika den yimjung lapokogo. Aser Yisu ya yakta maru nungbo yim aika timtem ajurutsü ta bilemtsür. Aleml nokbang nübangma nung alidanga yim o yimna lipok melepteptsü yimjung lapoka yur ni ama masamangateter kati yimchi lepa yimjung raksa-a tzülenkü m aenlenkü m ajemsarsa liasü. Tanüa Yisuji jembiba ama yakta marura matalokli medem kari timtemji bener arutsütsü. Idangji TENLA KIDANG tenük amur YISU MARU TASHI yimjung nangzüktepa to tamakitsü akü mtsü. Yim ana tsü ngdabo yamala nangzüktepa yur tanur kati o mekü mdangi jembiba ajanga shimang ana tashi chia shimang agi sü dangba koba Aor Sobaliba nung tatalokba tamajungtiba ta zü ngashir ajia atalokogo. Kechiyong shin o ka nung tai toktepbajagi tesüiba memelenshir "Forgiveness does not change the past" ta shia lir. Ni putu yimsüsür kar dang yamai ashiba bilemteter. Asenok yim ana 18th Oct 2009 YISU MARU TASHI atema yimjung lapokba to tanü ni raksaogo. Kechiyong küm 13, 2009-2022 tashi menua Yisu maruba agi tanü ya ajurur. Revival sentep nung tama tesü raktepa noktaker tai nangzüktepdang tzülu mo atemdang metetdi ta ashiba ama ataloktsü. Anungji Aor atema Yisu tang arunungbo, tai nangzü ktsüa mali tatoktsüa maka mapa tezüpazük asütsü aser aji maru nungbo aika dak aibelen ajurudang ATO NA ALEPTSÜ jembiba-a ato tabaji ataloktsü tsü bua bilemtsür.



Christmas Nung Ozü Jabaso Tangar Nem Aputsü!

A senoki tangar nem sen agütsüba agi temulung anisüngzüker melili. Senji teperi masü, senjibo tanga nungia angutsü, saka parnoki asen mulungjang nungi adokba temeim nüngdaker. Anungji na aolen ajak nung ne temeim perokang; tamasa nai ner kibong nung inyangang. Ner jala jabaso nem ne meim agüjang, ne kinungtsü mesüra kinungbo nem agüjang, aser kidanger nem agüjang. ~ Mother Teresa

Nisung kari kü nem tebur chanu arishi küm asem mesüra pezü ka taküm Christmas kü den amungtsü asoshi aputsütsü asü? Ozü ki tajung lir aser kanga junga anepalur kidangi bener arutsütsü. Ozü jabaso ka liasü, saka pa onok den tangbo mali, aser Christmas kodang arudir onoki pa kanga menungrar. – N. Muller

Osang kakat nung kodang ni iba ocet tatsüka ya züngshi, kü dak langka atalok. Kübuba süadoker külen ozü jabaso küna kanga azüng meyaka liasü saka iba ocet ya zünger kü mulung nung tasüngdangba aika aru. Yimo zülur dangi züluba shityji ni lephsia aiben züngpet azüng.

Ita ishika tejaklen, Washington nungi kübuba ajungbena lendong ka nung

asüba osang aru. Iba mulungzürep jagi jabaso küna kisüng meliteti ozü yimtsüng nung oa tsürabur den semloka alitsüsa aküm.

Ni jabaso mesütsü atema anogoshia ayangi ao aser anogotem süia aodang kübuba menungraba meilongi amadoktsü merang. Saka mapang aser anogotem kar lir koba agi kübuba teti bilemtetdaksü- Pa asoba anogo, kibong akümba anogo aser pelatepa senzüba tesemtem.

Taküm Christmas nungbo, iba oset tatsüka osang kakat nung adokba yagi kü mulung tali ayanga aküm: "...Ozü jabaso ka liasü, saka pa onok den mali, aser Christmas kodang arudir onoki pa kanga menungrar."

Nia parnoki menungrabaji komar meteta lir, saka parnok dang nungi balaka kü denbo jabaso ka lir. Pei jala jabaso aliriang metettsü, oda Christmas mapang chirnur tenük nung ranglokba tepelaji tebang agi rasa ashitsü makok.

Parnoki aginüba osangji ni telangzüba agütsü. Iba sülen meteta aruba agi osang kakat nung zülur ya tebu (widower) ka liasü. Paji pa tsürabur den liasü. Kasa küm kinungtsü aser jabaso



tena prongla süadok. Pakümji jabaso küna iba tebursang aser tetsü den külemi jangratema oda tejashi ajak amadoka pelatepa amung. Ni asoshi tajungtibaji, iba küm sülen jabaso küna kodanga azüng meyaka Christmas mamung. Aser

reprangang, tebur shibai osang kakat nung zülü, paji ita ishika lir kü kinungbo aküm.

Mrs. N. H. Muller

Source: Chicken Soup for the Christian Soul © 1997

KOMA SÜLA?

ENPO-i akangba ama mesüi Centre-i parnok nem statehood balaka melemzüksüra aser iba ajanga aruya aliba 2023 Nagaland Assembly Election nung parnoki shilem magira koma süla?

Statehood meshiba aser Election mapaji khenyongi balala. Election yabo pa mapang taktakzük nungjibo agitsübasai bai constitutional mapa. Indian senso shingai ibai maidoktsütet. Nüburi kechikomala araa atoaka pa mapang tatong nung Election Commission-i notification agütsütsübasai. Political Party ka atema artsü maka anungji nüburtetmi nokdangaka politician-temi high command tetoyuba nung ajemdaker nomination paper file süküm.

Election voting magitetaka shiri nomination file südir item candidate-ji tatok akümtsü. Nomination file asütsü atemaji par litsü nungsa mesüaka mashi tesem ka nungi asütsü melaküm. Govt. atema Constitutional mapaka inyaktsüsbaji lenmang sademsadema dang lir. Shiri shilem magilir parjisa akoksatsü. ~ T. Imo Jamir, Changtongya

Amit Shah-i ENPO dang nenok seat 20 nungji ajaki BJP ticket takok ngutetra state tasenji agütsütsü ta shira ENPO puria kota ka langzütsü ta bilemer. Tan ENPO puri tangar kim aija par lima ternerelok mapa meinyakba tashimait kümja noktaker. Saka par nüburi seat 20 nung amenertemjibo kotak tenyar ta parnoki bilemer. Item jagiang par lima terenlok mapaji bener arutsü tabo parnoki meimlar. Oda shidi süra parnoki parnok kechiba kechi akanger aji mejangja ama nibo angateter.


State Assembly election nung shilem magidi asürtemji akoksa. Sangküm February mesüra March nungbosa agitsü. Indian Government ajanga ENPO nem state tasenbosa magütsütsü aser aji entsülashi tezü nung atangba ama yimdong kazüria angur. ENPO Nagaland state nung medenli asür saka Nagaland Government teyaribo aginür. ~ Apong, Dimapur

Assembly Election nung tokteptsüpur asoshi Ao litsü nung Senso Candidate ya mali nunga koma süla?

KOMA SÜLA? nung nai koma bilemer iba telangzübaji tan ita December 27 tashi nung onok dang Whatsapp/SMS ajanga ojang 50 tashi nung ne tenüng aser address dena ajenloker yokangma.




8257029272




PUZZLE

Olong Paitep 0023



By arrangement with Lenjeter Copyright 2022

Taoba Adok nungi telangzüba 0022



TIPLÉN:

- 2 Lia aotsü jenjang (3)
- 3 Samen (5)
- 6 Tilutsü (5)
- 7 Lir (3)
- 8 Taküm tatem (4)
- 9 Shilu ka (3)
- 10 Saku (5)
- 13 Khen atema agia ataba (3)
- 14 Remzüka ao (5)
- 15 Alu, tzülu tusa (3)
- 18 Süngdonglidong maliba tesem (5)
- 19 Mesük (3)
- 20 Rateta ashi (4)
- 22 Süngzü agi naiba (3)
- 24 Jakzüik (5)
- 25 Tzü memerük (5)
- 26 Lulaa aküm (3)

LANGTSÜNGLEN:

- 1 Tsüingsangba (3)
- 2 Mezüngbuba (4)
- 3 Lenisang (3)
- 4 Sen Terasa (5)
- 5 Tiptema atem (5)
- 6 Temokong mapang (6)
- 7 Mapang talangka (9)
- 11 Mejangba nungi shilang (4)
- 12 Chiok (4)
- 16 Tajangzüik mali (6)
- 17 Apijem (5)
- 18 Tai mali ta o bendang agütsü (5)
- 21 Mapa nung asem (4)
- 22 Renlokba, tuluba aküm (3)
- 23 Tobur junga sobu (3)

SUDOKU

Sudoku Winter Special
0023

Grid 2

1	5		4			6		
		9	6	7		2		
		6			1	4	9	
		5		3			2	9
9	1		5				4	
2	4				9	5		
		2	9	6		1		4
6				1	5		8	
	9			4		3		5

Grid 1

			1		5	9		
			6		7	1		
			9	7		2		
	8	7			6		3	
2	5		1	9				
		4		8	5		1	4
	2			5		9	8	
	7	8			9			2
5			8	2			7	
7			9		2	8		
		9	5			2		
8				4				5

Grid 4

By arrangement with Lenjeter Copyright: Mongti Jamir 2022

YAMAI INYAKTSÜ

Taoba mapang ama GRID 1-ji tama inyangk aser iba sülen tanga tanünga GRID-temji inyangkma.

PUZZLE ojang ya Ao nung koma meyiptsü? Shibai tajungba meyiptetdir ibaji agitsü aser iba tapak nung temeyipertenüngji teti alitsü.

Grid 3

		1	3		8			9
	6			9				1
4		3		1				8
7		6	8				9	
	8			6			1	3
3					9	6		

Grid 5

Taoba Adok nungi telangzüba 0022

6	4	2	9	3	8	5	1	7
7	1	5	6	4	2	8	3	9
9	8	3	7	5	1	4	6	2
1	6	7	5	2	3	9	4	8
3	2	4	8	6	9	7	5	1
8	5	9	4	1	7	6	2	3
4	9	1	2	7	5	3	8	6
5	3	8	1	9	6	2	7	4
2	7	6	3	8	4	1	9	5



Subscribe Süang

TERM

1 year 2 months
(14 Issue)
2 year 4 months
(14 Issue)

You Price ₹ 840.00	You Price ₹ 720.00	You Save ₹ 120.00
You Price ₹ 1,680.00	You Price ₹ 1,400.00	You Save ₹ 240.00 + free gift

Postal ajanga
yoktsüsa süra
küm ka atema
₹ 140 (10x14)
tali agitsü.

- ☐ Postal ajanga
yoktsüsa
☐ Agent ajanga
agütsüsü

Hao! Ni Lenjeter Subscribe senür

Tenüng : Mr./Ms. _____

Address : _____

City : _____ State : _____ PIN _____

Post Box No..... Küm kwi atema : ☐ Ka ☐ Ana

D.O.B:...../...../..... Date:...../...../.....

* E-Mail Address melira magütsü nunga kecha masü.

SUBSCRIBE AGIAALIRTEMI METETTSÜ:

Tazüngertem mulungsüa züngdaksütsü onok tejangra.
Na temulung süa mezüngra, nai tenüngba sen meyipa
agitsü akok.



+91 8257029272



Woods Publishers

Liden Ki Meriema, Kohima: Nagaland

woodspublishers@yahoo.com

+91 8257029272

Translation :

- English to Naga Languages
- Naga Languages to English
- Hindi to Naga Languages
- English/Naga Languages to Nagamese

Proof Reading Editing :

- English
- Naga Languages
- Hindi

Design & Printing:

- Books, magazines, programmes, calendars etc.

All Published Books will be provided ISBN

Kinungtsü aser Kinungbu Külem Sannüker Mapa

Source : www.nokinketer.com

~ Imnabenla Jamir (Bangrapet)

Ibai June 30, 2021 anogo website nung adokba anungji data karbo melenshir alitsüa akok. ~ Editor

Okila: Asenok kanga kara melenshiba lima ka nung alir. Khristan yimsü aruba, shisaluyim balala, ronsen ketsüng maparen balala, aser tangar shilu den meyoktepa alitsüba putu ka nung alir asü nung asen tetsü-teboui benshiba sobaliba maparen aika melenshiogo. Tematiba degree tashi tetsürtem aikati tongteta azüngba ajanga yimden-yimli maparen aika nung takok ngua inyaka arudagi. Tamangba yimsü nunga takotet lenir tajung aika adokogo. Tetsür Laiputishir jendi adokogo; yimsüsür takoktet jendi adokdagi. Asen Naga kin rongnung, tat. agi, Konyak, Chakeshang, Sema nungerbo yimtsüng putu menden nunga tetsür shima anir aor. Saka Aor Jungliyimti putu sobaliba nungi mainshili ta asür. Yimtsüng putu mendenbo yutsür, arogo nunga sünga tetsür pastor inyaksü ashishir; yimtsüng arogo kar nungbo tetsür deacon shimtsü ashishir. Anungji tarutsü putu asen jalatem jenjang yanglushitsü nungdak aser ibai lokti aser arogo nung ochimashi mapa ka aser melenshitsüla ta ajiteta Yanglushidi Sensaksem Sabang (YSS) nung onük benoka jembi aser tejembiba nungi bilemdangtsü asoshi olen kar lemsateper.

Aotsür tenzükbä jenjang: Ao arogo tem nung Aotsür tenzükbä jenjang tekübokti jenjang nung yuja lir ta ashitsü akok. Kin isab theology azünger asadanga, India nung Aotsür ya theology azünger teimtiba asütsü. PhD/DTh azünger ajak agi Aotsür

19 aser tang tezüngdak, thesis submit sür result atatem ajak meyokteper 18 lir. Tang Serampore kübok Doctoral Dean-ji Aotsür. MTh, MDiv/BD, BTh ta azünger ajak meyokteperbo meyirijang ka shi. Aotsür karbo National aser International level tashi nung leadership agüja arur, saka Ao arogo nungbo tanü tashi tim shilem tetsür nem magütsür. Akhi putu yimtsüng yimsüsüba amai dang arogo maparen nunga bener odi asür; ibai Lai tesayuba masü ta angatetdi. Arogo nung ochimashi tulutiba kaji tetsür nem tim shilem magütsüba yaa ka ta metetdi.

Khristan yimsü arur, Ao arogo küm 150 (2022) ajunger, saka tanü tashi tetsür ana Pastor inyakdangba dak alaka, arogoi tetsür meshimer. Mungdang nung tanü tashi Executive Secretary tetsüri inyakdanga mali, Women department nung secretary inyakba dak alaka tanga department nung tetsür kata tanü tashi inyakdanga mali. Asenoki metet, arogo ajak nung tetsür tenzükbä shilem Sannüker Temetanger (Associate Pastor – Women) mesüra Tila Tanur anishitsü (Education Director) dak alaka arogo nung tongti shilem magütsür. Kechiba arogo nung tongti shilem magütsüa nokdang? Ya Aotsür tangar memenepeba agi masü, saka arogo yimden yimtsüng putu menden amai dang bener odi ta asüba ajanga adoker. Alima ajak nung tetsür-tebur ajak kasa shilem agiba angutsü anungji tanü tetsür tenzükbä mapa nung sadema magitetbaji ochimashi inyakyim ka ta

angattetdi.

Kodang theology azünger Tsüngrem tenzüker ka den, tat. agi, Pastor ka den kibong kümra mapa inyaksü shibangadoker. Tanga lima nung ama co-pastor shimdi ta mejembir. Arogoi mapabo magütsür, saka secular mapai ira, mesüra business tera inyaker, lokti nung tejendokba nisung amai ajir aser aitsür. Arogo nung employment peria maliji theology zünger, talisa tetsür, mapa maka aika lir. Yamaji lira bendanga agüja mazüngba agi mapa mali kazür ta jembitsür; mapa adokaka tetsürbo meshimer. Süra Aotsür theology azünger jenjang kong lir? Tanga lima nung ama kinungsü aser kinungbo külem-sannüker (co-Pastor) sütettsü asü masü? Lenir kati yamai langzü, “Asen Ao/Naga arogo joko küm 149 tain akümdang, Co-pastorji agizüka inyak nung Tsüngrem tenzüker nung tetsür-tebur tebandang mali ta aser ochi mapa (justice) sayutetba ka asütsü.”

Kinungsü aser Kinungbu Külem Sannükba mapa

YSS nung tanü atema dang masü, saka tarutsü nung asen jalatem tenzüker maparen nung tetsür-tebur telemsa makai liromedema aotsü asoshi “Külem-Sannükba” (co-pastor) mapa ya apettsü asü masü ta lemsatep. “Külem-Sannükba” ta asüba ya kinungsü nem honorarium tera agütsür, mesüra kilir teyarir ayuba tangatetba nung ama masü, saka ochi mapa inyakba, Lai tesayuba atalokdaksüba mapa amai angatettsüla. Ya apu-ani anaprongla sannükba khuret saku agütsür inyakba tsütsü nungi angatettsüla.

Hau, “külem-sannükba” mapaji kibong ajak nungbo mapettsü, kechiba süra (a) kinungsü mesüra kinungbo ka arogo nung tenzüker, aser ka secular mesüra

mapa tanga inyaker ta lir; (b) kibong kar nungbo ka arogo toklang tenzüker, kabo kecha meinyaki yariteper; (c) kibong kar nungbo ka toklang tenzüker, aser ka taah kecha magi music, youth, arogotsü, sarasadem telok, Sunday School nung yariteper; aser (d) kibong kar nungbo kinungsü aser kinungbo anaprong kasa theology zünger sempet tajung akaba nübu lir. Par kibongji “Külem-Sannükba” inyakdaksü nung arogo leman aisü nung nübur aser arogo tajanzük angutsü aser tenzüker nung tashi taitba bener otettsü. Temalen Narola McFayden-i Laishiba tamendak aser koma inyaka aotsü tejanga shir asü nung itemji meleshir. Iba “Külem-Sannükba” mapa ya inyakteta ao nung “Tebur dang Pastor” ta asüba tangatetba mulungsentsü ya tarutsü nungbo melenshia aotsü imlar.

Mapa tasen inyaksü jangratsüla

Putu ka nung tetsüri school nung tesayur inyaktettsü na? tanurtem azioktetdi ma? SDO, DC inyaktettsü na? ta bilem. Saka parnoki tebur den kasa, mesüra tajungba inyaker ta tanü aikati jembir aser mapa agi sayuogo. Sensaksem mapang lenir karibo yamala külem-sannükba inakyim ya Anülulen (Western) lima benshiba mapa ka lir aser asen lima nungbo mapettsü alitsü ta terata o shisemogo. Tangbo mapettsü, mapangi bener arutsütsü – mapangji kodang arutsü? nisung kar asü atar asü? Temelenshiji tanü asen tendak metenzükra kodang tenzütsü? Ano karibo apuani anaprongla Arogo tenzüker mapa nung lidir, chirnurtem shibai anepalutsü? ta terata o shisem. Ano kar-i Lipok 2:18 nung ajemdaker tetsürji tekolak mesüdaaksütsüla kechiaser tetsürji ‘teyariteper’ ka asütsü Tsüngremi yanglu aser sati kulizüng agidang-a yamaji nangzüker akümer ta tangatetba lemsatep. Ibri oshi nung

“Ezer” tetezü “helper” ya Tsüngrem ta shia lir (Anitet 18:2), tashi tuluba, kin tuluba kati dang teyari agütsütsü akok. Saka Aori helper – teyarir ta asüba ya kidang mini-kancha ayuba den medemdanga tetsür jenjang ratetba agi lokti aser arogo nung tang tashi toklang tenzüker mapa nung tebandang atokba lir. Ano Ibri oshi nung “ezer” ya kati dangbo meinyaktetba ka inyaksü yariba den medemdangsü akok. Talisa T. Ken nung aiben KIBUBAJI kü teyari ta alibaji Lipok nung aliba denji kasa. Tsüngremji teyari ka lir. Yisui Tanela Temeshi teyarir asütsü yoktsü ta ashi. Teyarir ta asüba kilir amai mangatettsüla aser teyari ta asüba jenjang tekübokba amai mangatettsüla. Tebur bilemba tsütsü atsünga Lai mashi ratetba ajanga tetsür tenzüker maparen jendoka lir. Laishibai arogo aser arogo tajaba kechi ashir, tenzüker indang kechi ashir aji meyipa repringshi nungdak ta ajiteter. Asen lima nung külem-sannüker ya mapa tasen saka tasü ita tenzütsü mapang tongogo. Anungji theologian ka den kibong küma lira tangatetep nung tapet mapa inyakdaksütsüsa arogoi leman lapoktsütsü nungdaka kümogo.

Teinyaksü tongtibang kar


Arogotem nung deacon aser toklang tenzüker arogo inakyim koda melenshia aor aser koda tashi taitba nung inyakba aotsü shisadokden mapang shia akatsüla. Akhi mapa dang masü, mapa tasen inyaksü jangratsüla.

Mapa küma aotsü asoshi Mungdang lenir aser arogo nung Toklang tenzüker nübör nem rajema angatetdaksütsüla. Laishiba tekong ishika shimea yangji ajemdaker tajung – majung, tagitsü – magitsü o lepdang magütsütsüla. Laishibai kechi tensa nung zulu aser aji asen nübur dak apet ratettsüba jenjang tongtibang.

Yimtsüng Arogo kar nung rongsestsütsü tashi melira, ABAM-i aser jila arogotemi iba khuret lemsateptsüla Arogo nung sannüker shimdang kinungsü/kinungbo teinyaksü shimtsü (options) kibong nem agüja par nem latetdakang.

Teshisadangtsü ka

Külem-sannüker ta asüba ya tetsür jenjang bushiba ka dang, mesüra anülulen inyakba tangatetba ka indang jembir ta mangatettsüla. Saka tenzüker mapa nung ochi teinyaksü ka ta angatettsüla. Alima melenshi aoba den arogo aika nung Külem-sannüker mapa inyakba odagi aser arogo aika nung tajanzük anguba kuli lir. Theological college nunga kinungsü aser kinungbo anaprong sayudaksüba ajanga children education allowance, medical allowance, ki amala nung sen talila meindoki anapronglai tenzüker ajangshia arudagi. Yihusua 24:15c nungji ashir, “Saka ni aser ozü kibongibo, onoki Kibubaji tenzütsü.” Süra, Arogo nunga külem-sannüker asütsüji tamakoktsü masü ta bilemer. Tasen Lai nunga Pricilla aser Aquila külem-sannüker inyakba angur. Yisu Khrista-i aser Laishiba-i shianga tebandang makai ajak Tsüngrem mesükba nung yanglu. Tsüngrem aser Arogo wadangi tebur dang lenir asütsü ta Laishibai mesayur. Anungji lenir C. Walu Walling-i ashiba ama “Arogo tulu-tila-town-yimtsüng kecha melemsai ... ajaki agizüktepa bener aotsü nungdak. Iba temelenshiji shibai kong nungi, kodang tenzütsü ta ataa melii 2022 nungi tenzütsü pastorbai anir arogo nung den sarasadema mapang tenzüker. ABAM nung telemtetba agir külenang inyakdi ta atadang mapang tajungji süitemtsü.” Anungji külem-sannüker mapa ya inyaksü mangdang agüjang ta sarasademdi.



MISSIONARY

Allen Gardiner

Captainbai ni anioxtsü nangzükogo ta Alleni tebu dang mapang shia ashi. Tebui ashi, "Nabo ano kanga tanur anungji küm ishika ata liang." Tetsü mapang shia Allen taktangi aidang pa atem nung sa mejanga liasü. Ibaji ngua kechiba yipten nung masü atem nungsa mejanger ta asüngdangdang, "Ni tzüyim nung Captain mapai aotsü atema kü temang azüoker." ta tanur jagi sa ashi. Iba amaji lanuwa nungi pa tzüyim nung jahaz anishir ka akümtsü tejangraba tulu liasü.

Samuel Gardiner aser Mary na chir Allen Gardiner England nung 28 January 1794 küm aso. Pa lanuwa nungi Mingo Park aini aoba otsü kanga sapua azüng. Africa lima otsü azüng aser Africa oshi tongtibang kar angazüka pai itemji zülua ayu. Alima sema senzütsüji pa tejangraba liasü. Tzü awatsü aser kor nung mener senzütsü kanga jangra.

Gardiner Naval College nung azüng aser pa küm 16 alidang iba college nungi graduate asü. Iba sülen jahaz anishir telok nung aden. Küm 4 lir pa Lieutenant aküm aser jahaz ka nung Captain aküm. Tetsüi pa khristain tajung ka kümdaktsütsü kanga meranga sayu saka pai iba nungi talangka pilar ali. Kenü tebui züluba tetsü taküm kaket ka pai züngshi aser tetsü indang tali metettsü merang aser tetsüi kanga meimba Tsüngremji pai tali bushitsü

meranga liasü. Pai Laishiba ka ali aser ibaji azüngtsü tenzük. Iba nungi tenzuka pa temulung meyipa khrista agizük.

Captain kümer tzüyim nung alima aika sema senzüdang nübur libaliro angazüktsü pai kanga jangra. Mapang ka Pacific tzüyim nung asetkong ka tenüng agi Tahiti nung parnok anenzük. Tzüyimkü atongdang shinga melii azüngazünga dang liasü. Yimtak jagi ai nung khristantem ishika sendener yangji nisung kati sayutsüngia laisü. Ibaji Deobar anogo ta pai bilemtet aser parnokji tekülem sentep agir laisü. Tanga yimtsüng ama mesüi khenyongi balaka iba yimti ngua pa kanga süngmang aser temulung nung kongshi. Iba ama tia nung nübur anitetbaji tanga kecha agia masü saka Missionary mapa agi ta pai yimdangi aru.

Pa South Africa aser Southern Argentina-i aodang nüburtemji kanga dang tekübok tia nung aliba angu aser parnok tamang yimsü kecha maliba pai reprangtet. Item nübur tia angudang pai jahaz anishia Captain mapa inyakbaji toktsür Missionary mapa ang inyaktsü mulungtet.

Iba sülen pa 1934 küm South Africa limai ao. Ibalimanungji osangtajung kodanga mangashidang. Pai yangji kin ka tenüng agi Zulu indang angashir liasü. Pa kor nung mener ao aser iba kin dang osangtajung pai sangoktsütsü merang. Iba yimtsüngi aotsü atema lenmangji

kanga tasak liasü. Tzüta ajanga aodang per tulu ajurua arshidaktsü. Ayong tulu wadanga aodang tzürang aser angu tulu nungi ajen. Ayatzüra agi kangshia iba yim atong. Zulu nung rongnung chubaji kanga tesashi liasü. Yangji Yisu indang osangtajung sangdongtsü memulung. Küm ishika lia arudang South Africa nung pa British Ambassador shim saka Zulu aser temesüng nisungtem tsüngta mepetmesü adokba ajanga pa yangji melitetsüsa aküm.

South Africa nung küm aika tejakdang nüburtem arem shiruru ama aliba tia ka nung Allen Missionary inyaktsü ao. Tsüngremi pa ajar ta pai meteta liasü. 1838 küm pai kinungtsü aser par chir anir tanaben South Africa-i Missionary inyaktsü apusoa ao. Alinükji tonger tamasa Arauca kin bushia ao. Kechiba süra iba kinji tangar dang nungi tera tashi temetetba liasü. Anogo 14 tashi lenmang tamajung aser ayongtem aika ajanga jajar külen yimtijji atong aser ki ka nung taa agüja anenzük. Parnok tonger anogo ishika lir külen iba yimti nung tongtiba arua parnok osettsüset ajak bener meyipa oang ta ozüng agütsü. Nisungtemi parnok anema jembi aser Missionary mapa inyaktsü memela.


South Africa anüdoklen tip tsütsülen alir shirnok pai akhidang ajuru, parnok dangi ao. Tzükü takong lima, kecha makadak pai süngküm tongnü kar bendena nübur teyari agia ki tila ka asü. Item tembartem aser pai mulung lemtetbapurtem asoshi teyari bushia England limai ao. England lima nung oagi pa tebilemba matalok saka pa temulung ilaa maküm. Küm asem lir 1844 küm South Africa nübur asoshi Patagonian Missionary Society ka pai tenzük. Kodang pa yimti jagi tanaben

meyipa aru, yimsüsür tasen ka melener liasü aser iba yimsüsür jagi pa meyari. Yimti nungji par kibong den yimer shinga amalitep malitsü ozüng agütsü nung par kibong tanaben England limai meyipa aotsüsa aküm.

South Africa limai tasembuba arutsü merang aser ibaji Bolivia limai aru. Iba linük nung pai yim terka semdang aser pai aginüba yimeri pa mapa inyaktsü memulung. Pa den külemi arur aika ranem agi shirang kechiba süra mail aika tzünglu arua anü puaka tetsüng agi dang jaja liasü. Tatemsa pai aginüba ama mission mapaji inyaktetsüsa mapang angu saka tia maka alima tensa mejungi aküm nung England-isa meyipa aotsüsa aküm.

Iba mapang tashi nungbo joko pa mina arur medemertem tezüdangadoker liasü. South Africa limai pezübenbuba merangdangdangbo pai teyariteper tasen anir ao. Iba mapang pai asetkong ka shimtet aser yangji talitsü ki tilaka asü. Saka yangji alir nüburtemji nisung mejungi liasü aser parnokji bener aruba oset ajak aoya bener ao. Anungji kechiang meinyak England limaisa meyipa aotsüsa aküm.

Gardineri pei mapa tajung toktsür Missionary mapa inyaktsü tenzük joko küm ishika süia aor. Pai jangraba mapa junga matalokaka pa tasü ita dang liasü. Pai merangjen merangaka tamakok dang angu. Aikati pa dang tamashi aja saka pai item ajakji aremzüka pa dak mulung lemteter ali. Pai pei nükjidong medoktsü. Mission mapa asoshi pa aser külem inyaktertem alitsü mission jahaz tila ka pa ket nung aka nungang ajungtsü ta pai apitet. Iba jahaz yanglutsü mission society nungi sen magütsütet. Pai pei sasa meranga bendenba sen agi jahaz tila



ana yanglu, jahaz ka tenung Pioneer aser ka tenung Speedwell ta tenung jaloktsü. Jahaz ana nungji osettsüset ajak inoker parnok nisung tenet mener South Africa limai apusoa ao. Tzüyim nung anogo aika jajadang Pioneer jahazji raksa. Ita junga jajar asünung jahaz nungji timtem ajuru. Joko tanendak bushitsü tenungdaktsü aküm. Parnoki Spaniard jahaz anendaki bushia ao. Ibaji asetkong ka teyong nung liasü. Parnoki lung ka nung Spaniard jahaz anendaki aor ta zülua toktsü. Parnok anenzükdakji shiti nung, "Onok rongnung karbo shiranger, chiyungtsüa techimar. Teyarir yakta marura onok aya agi süadoktsü." ta zülur bottle tazung nung inoker ali nung songdaka yutsü. Parnoki bilem teyarir kar danga arura item osangtem ajanga parnok yakta kümzüktettsü.

Anogotem süitema ao saka teyarir shinga maru. Parnoki chiyungtsü renema bener apusoba ajak chimadok. Teimla samadok. Parnok kümzüktetsüa anasa shinga maliasü. Ango pua achitsü tasak. Shirong ka pua iba shi jagi anogo ishika süidaktsü. Arem koya aser süngolio chia anogo ishika süitet. Ayaba den temang nung tashitak aser komolongra adok. Iba ama timtem dang Gardineri pa dairy nung yamai zülü, "Ni kanga tashi meiti aküm nung anüngdang kü yipten nung mejanga ali. Kü taküm anepalutsü joko Tsüngrem dak dang tamang ayur. Pa temeim aser mapangji dang ni atar." Gardiner aser pa medemer tenati Pioneer jahaz koba tzüküm anasa raksar lir ibaji ali tekongleni atsür aru aser ibaji sü agi meibanger yangji ali. Pa metemer pezü Speedwell jahaz nung ali. Iba jahaz ana tetsünga mile ka shi pila liasü. Tzüsem agi jahazji raksatsütsü tsübuja parnoki jahaz anaji nüka ali. Parnok anogo aika chiyungtsü tachitsü makai yaseta alinung jahaz ana tsüngta

kati ka semdanga senzütsübaji mapa kanga tasak aküm. Iba mapang Gardineri yamai zülü, "Onok Missionary telok tila ka ya, ka khen ka khen ta teyanglur dangi Pai anir aor. Onok taküm Pa ket nung dang lir. Onok melena onok dang nungi tajungba Pai anitettsü aser iba wadang nung Pai parnokji anioktsütsü." Külem medemertem ajak süadoker külen pai pa kinunger dangi tatem o kuma tarutsü nung pai tenzüka yutsüba mission koma bener aotsü ibaji zülua toktsü.

Tatamsa kibubar wadang nung timtem tulu arema arur September 6, 1851 nung asetkong nungji yaseta asü. Chiyungtsü abenba jahaz ka October 21 nü iba tesemji tonga aru. Tejashitsüka item missionary telok tila ka nungi nisung ajak yaseta sür angu.

Missionary aika dang nungi Gardiner taküm ya balaka. Pai Tsüngrem osang mangashibapur dangi abentsü küm aika merang saka kenü danga pai item nüburtem medenzüktet. Allen Gardiner ya Tsüngremer metsüjang ka liasü. Pa asüba ajanga tejang jenti atang. Pa aser par telok timtema asüba osang angashia arogotem aika nung koshi. Iba otsü alima ajaklen prokshia ao.

Gardiner aser par medemertemi taküm tenla. Iba ajanga Patagonian Missionary Society tashi itshi aser Mission mapa nung tali temulung agüja inyak. Jahaz ka nung Allen Gardiner ta tenung zülur missionary aika pai meranga inyakba lima jagi oa osangtajung prok. 1857 küm Gardinerer jabaso Allen W. Gardener tepui mission mapa inyaktsü marangba linük Patagonia jagi British missionary inyaktsü ao. Allen Gardiner metsüh ali tajung nung arem nung temoatsü jenti aren. Koda tepelatsü aser temoatsü!

L

MECHIMENU KA NUNG AIBELLENBA AJANGA ALIMA NUNG TEMELN- SHI TULU ATALOKBA

Khenkhenbo mekümdangi tilateri ka nung aibellen-dang takoksa aser temasa tulu ajuruba aliba otsüren nung angutsü. Asenoki meteta aser kümdanga alitsü asoshi yangi kar lemsateper.

**Edwin Rommel kinungtsü den taso-
ba anogo külemi mungnüdag tama-
kok ajuru**

Germany nunger lenir Adolf Hitleri pai temulung kanga alemsang General Erwin Rommel dang France northern coast len akaba Normandy beach tsükchir ket nungi kümzüka ayutsü mapa nungloktsü.


Rommel shiba dang Desert Fox taa ajar pai bilem tsüngsang mejungi kanga mekongba ajanga tsükchir yakta arua matongtsü. Pai yamaji bilema tebuttsü



tasoba anogo munga kazürang pa nem nungloktsüba mapaji inyaktsü sentong yanglu. Saka pai bilembaji tai liasü. Tebuttsü asoba anogo June 6 kasanüji, tsükchirtemi Normandy ayongküm nung akaba beach pungu prongla atsüngtet. Iba anogo nung German se-poy 9,000 shi tepset. Rommeli pa nem nungloktsüba mapaji temulung agüja mapang shitak nung inyak asübo par sepoy paikaji mesüla aser ayongkümji tangar nem merakzükdaktsüla.

**Oshi junga mebilemdangi mey-
ipzükba ajanga Hiroshima nung
bomb pokloktsü**

World War II mapang America nungeri Hiroshima nung nuclear bomb pok-loktsüba ajaki meteta lir. Saka America aser pa den adener (Allies) den Japan oshi meyipzüker tajungba ali asübo iba lendong ya paitoktsü koka liasü. Parnoki Japan nunger dang surrender



asütsü asüngdang aser ibaji langzua Japan Prime Minister Kentaro Suzuki par oshi agi, "Mokusatsu" ta langzū, koba tetezü 'Nenoki asüngdangbaji khen bilemdanger langzüdi' ta langzürba liasü. Saka America nunger Japan oshi meypzükeri iba telangzübaji khenyongi hao taa melii langzüba ama angatet. Kechiba süra Japan nunger oshi nung "Mokusatsu" tetezü ya oyim ana nung angatetsü koka liasü. Anogo ter lir külen America nungeri alima nung mezüng atomic bomb amshia Hiroshima amak. America aser pa den adener telok nung Japan oshi meypzükeri tajung liasü asübo iba bomb tesashi amshia Japan lima memakla aser nübur taküm jenti kümzükla.

Titanic rong rülong nung tsükdaker tzüym telungi aiba ya sapi ka manguba ajanga lir.

Alima nung Titanic rong tzüym telongi aiba tatalokba otsü aikati meteta lir. Saka iba lendong ya mataloki jenbutsü lenmang liasü ta ashir. Titanic rong apusotsü lia rong nung tanishisang ana melentep. Iba melentepba ajanga rong nungji timtem tulu ajuru kechiba süra rong tanishisang kati tasenba nemji sapi ka koba pongin (Binocular) shibanga ayu ibaji agütsütsü amadok. Fred Fleet, shiba Titanic rong nung



tanishisang liasü pai binocular shibanga ayubaji melapoktet aser iba ajanga rong tejaklen rülong alibaji mengui yangji tsükdaker rongji tzüym telongi alutsüsa lendong tulu ajuru. Tanishisang ket nung ibaji liasü asübo iba lendong matalokla kar.

World War I tenzükba ya gari lenmang tai shimba ajanga liasü

Alima nung linük balala tsüngta raterapa liaka shitakba World War I rateratsü tenzükbaji 1918 küm Austria nunger Archduke Franz Ferdinand kasetba ajanga lir. Pa amenba gari driver temulung memelenshi asünungbo iba rara ya metenzükla. Tatalokbaji yamai. Bomb lendong nung Archduke Franz Ferdinand taküm jenbu aser ibaji driver-i gari paidoka aniba ajanga liasü. Pa taküm kümzükaka iba mapang nisung aika asü anungji pai iba lendong nung yirur mozüki nung alirtem semdangnü. Driver-bai parnokji mozükilen indang indanga masü saka lenmang tangalen nungi aotsü merang aser parnok aolenji Gavrilo Princip shiba Ferdinand kasettsü atsüka ataya liasü ilenji ao. Gavrilo-i injang ana kaloktsü aser Archduke Franz Ferdinand aser tebuttsü na yangji atanga kaset. Aser ibaji ajanga World War I tenzük.



Russia nungeri Alaska ya United States dang ayok

Akhidang Alaska linük ya Russia nunger meyong liasü saka parnoki iba linük nungi tajung kecha mangu. Alinük tamajung ta bilema America nunger dang 1867 küm \$7.2 million yong langlanga yokdok. Saka küm ishika lir külen Russia nungeri kanga sasa kechiba süra Alaska linükji ali tomu agi sünga liasü. 1880's nung America nungeri yangji hon (gold) atutsü tenzük aser mapang tatsüka tsüngta alima nung hon teimtiba tutetba tesem aküm. Tanü tashi iba linük nungi hon maneni atur aser tanga Russia nunger kanga sasa alitsü.

Shikar ka arem nung samaba ajanga California nung merok mi tulu adok

Alima otsüren nung California nung atalokba mi lendong ya tulutiba lir. Iba merok mi tenzükba ya shikar kati mi asenba ajanga lir. Pa shikaa senzüdang San Diego arem min nung lenmang mungui sama. Pai meketa alir nem metetdaksütsü atema signal yoka arem nungji mi tilaka senoktsü. Saka tia makai arem nungji miji tuluba jangru aser merok aotsü tenzük. Iba mer-


ok lendong nung arem 3,00,000 acres dak tali rungdok. Ki 2,322 mitsü küma rungdok aser nisung 14 rungset.

Tanü tepsetba ajanga London nung Plague tashitak tali poktet

London nung tashitak tapu ka Plague ta sür poktet aser iba dang alimai Great Plague ta ajar. England nungeri iba mapang nung Plague tashitak wara ya tanü (cat) ajanga pokteter ta bilem. Anungji parnoki London nung tanü kwi lir ajakji tepseta indok. Saka iba tashitak ya tanü masü koya nungi poktetba liasü. Yimti nung koya pua achitsü tanü kata mali nung tashitakji tali aküm aser ita ter ti (18) tsüngta nung yangji alir nisung 1,00,000 shi iba tashitak ajanga asü aser ibaji alima otsüren nung Plague tashitak agi nisung teimtiba tepsetba lir.

Hessian nunger Trenton jila nung tepsetdaksüba

Ibai American Revolution nung atalokba. Asüka mapang Hessian nunger ya Trenton jila nung anenzüka liasü aser parnokji amaktsü asoshi Washington nunger Delaware yimtsüng ajanga süi. Yangji aluyimer kati parnokji angu aser Hessian nunger commander Johann Gottlieb Rall nem tsükchir aruba osang shiti nung zülur yok. Rall-i iba tekümdangtsü osangji lapoka mazüng. Iba tongpang nung Hessian nunger ajak tepset aser Johann Gottlieb Rall pocket nung iba tekümdangtsü osang yokba shitiji melapoki semer liasü. L



TEMANG ANEMA ALITSÜ

tesayuba

Asen lima December aser January ita nungya kanga mokoka akümer. Tsüng-sang mopung melen-ba ajanga iba mapang nüburtemi temang nung timtem aika ajangashir. Anogo tatsüba aser am-mang talangba asüba ajanga lenmang ka mesüra ka nung nüburtem nem timtem agütsür. Iba dak alia nisung ka temang nung poknüngpokra tashi mait kümdaktsür anungji temang anema alitsü atema chiyungtsü tim aser shitak anübalua achitsüla.

Asükwa mapang süngjanglijang aser süngolemba jenti adoker anungji item chiyungtsü asen temang nung apatbatema meranga achitsüla. Temulung-jang aser tanga shilemtem junga mapa inyaksü atema teti temang arakzüa exercise agitsüla.

Asükwa mapang anü tatsüba anguba ajanga anü nungi Vitamin D tejemba angur, iba ajanga temang nung tashi mait kümdaktsür. Iba mapang asen temang yamai shiranger:

- Neptzü ayangtsü mesüra teni adangtsü
- Terok ashitsü

- Akettsü
- Sachitsü
- Temang metatsü
- Temang angutsü
- Tekolak terara angutsü
- Temang teloktep angutsü aser ibaji talisa rishirtemi ajangshitsü.

Asükwa mapang item yimya benshira warashira nungi kümzüka litettsü.

- 1.Teti tzü jokotsüla:- Aogo shia tzü jokoia temang merüka ayuba ajan-ga anema toktsür. Saka anepdang tzü temokong agi mejokotsü merangang.
- 2.Chiyungtsü machidang aser chir külen teti teka metsükang, aser ano yimdong aser shishilembadak nungi arur tamasa teka metsüktsü mama-toktsüla.
- 3.Tzü peria jemang.
- 4.Chiyungdang süngolemba tamak, süngjanglijang takongtem, haldi, süngmok, losen aser ghee nunger dena Chiang.
- 5.Ice cream aser temokong chiyungtsütem majemtsü merangang.
- 6.Süoshi talem asemtsüla.
- 7.Yimra anogo 7 tashi nung mejungra tekara nung doctor ajurua temang anepalutsüla.



YAMAISA Ataloker

Lanuwa mapang nung kanga yongya ataa aliba kaji class pezü nungi pungui promotion atuba ya ka liasü.

Kechiyung class pungu nungibo joko teintet rogo ama züngshi. Aser class pungu nungi bodbar nü nisung shia pei pei house tola asemtsü tenzük.


Aser ni-a red (temerem) house nung lemsütsü.

Niji soru tila asüji, class pungu nungi class ter tashi tola kasajisa asem.

Iba boadbar uniform ya ni kodanga melentsüsa kü temangi memela.

Tar tatsü asüba tajangzükji iba ya ka lir ta ni shinür.

The copyright of all content/drawings (intellectual property) belong to The Midget and cannot be replicated or reused anywhere except for the stated purpose-in this case, Midget comic to be published in Lenjeter Magazine's 2022 December issue under Yamaisa Ataloker column. COMICS | CUSTOMISED ILLUSTRATIONS | STATIONERIES | themidget92@gmail.com



DECEMBER 27, 1994

MOKOKCHUNG AYATAI

~ T. Senka Ao

9436006118

December 27, 1994 kum Mokokchung town nung Indian Army Regiment (16 Maratha Light Infantry Regiment) ajanga mojing mapa tamajung Mokokchung nübun dak atalok. Iba anogo ghonda ishika tsungda nung timtem tekangshi aika ajuru aser idangji ki 49 mi agi rungtok, dokan 89 mi agi rungtok, gari 17 rungtok, scooter aser motorbike 7 rungtok, nisung 5 mi agi rungset, nisung 7 perangpong agi kaset, tetsür 8 rape asü. December 27 nü asür parnok 12 rongnung Aor senso asem dena liasü. Par asem indang tongmelang agi yamai adoktsür. ~ Editor

Tekayangchetba: Kibong aika asoshi Christmas aser New Year mapang ya tesungjem aser tepela mapang ka lir. Tsürabur aikati pei chirnurtem den mapang agia aliba mapang. Kechiyong office sodi aser tanurtema joko school result adoker azunga aliba mapang. Yamai medemer kibong aika ayongayonga aliba mapang ka nung iba anepdang Tekayangchetbar kibong kanga aritepa chiyung, kechiyong tebutü Rongsenpokla iba anepdang hospital-i tekabana nung atutsüla liasü. Iba anepdang nisung ka operation agitsüba aser medemer aika sodi agir iba operation agitsüba nungji la dang staff Nurse liasü.

Tebutsü hospital jagi atutsü aser Tekayangchetba par jabaso Imsütoshi tena dokani tugua tanur asoshiji süoshi kar alitsüba sentong. Parnok ajak memenui kidangi shilangtsü sentong nung Imsütoshi tenu asem kidang toktsür apusotsü lia Tekayangchetbai tebutü dang ashi, "Aya asenokbo kodanga anisungzüklen makai iba amai dang aritepa lir asütsü" aser pei pei mapa jagi senshi. Iba o ya tebutü Rongsenpokla asoshi tebutai ashiba tatembangbuba liasü. Rongsenpoklai ashiba agi iba tebuta o ya lai kodanga mamateter.

Tekayangchetba Changki nung; Imlinokcha jabaso, medical department nung accountant teinyakdak liasü. Office mapa dak

alaka pai nübun tenzükba nung pa rongsen, sempet aser nübun agütsüba nisung ka liasü. Par Ward Union nung Secretary inyak aser CYE nung advisor liasü. Tsükong aser yimer telongjem nung pa nübun aser rongsen agi nübun tenzükba mapa aika inyaka aru.

Par chir Imsütoshi Madras nung theology azungsang nem süit ka artsütsü tenük dak sülokba sü ka alitsü asoshi Tekayangchetba o jabasona Maya store jagi ai. Idakji mezünyongi Imsütoshii saklokba pa suit artsü süji ali. Süji aleper pai amer lia idangji army jagi nungbanga nisungtem atsüden aser repranga alidang injang yok. Tekayangchetba Maya Store dokan temaba taktang jagi iba dokan nung külemi alir Kilingmen nung Korazüng tena kechi ataloker ibaji reprangtsü atu. Saka par jabaso kimai pungteta tugu. Tebu tena piladang Imsütoshi-i "Oba" ta ajabaji tepila o tatembang liasü. Army jagi dokan kishitem shibanga idakji petrol shiloktsür mi yok.

Mi jagi rongsetba aser injang agi kasetba temang bendena taoksa tulu nung Mokokchung yimdong asung. Saka Tekayangchetba mali. Kidangia maru mesüra osang kecha mali. Army-i pur or lira ta asungdangtep saka parnok ket nunga mali. Anogo nungi hopta aser ita ka shi Tekayangchetba

mang bushi. Saka mungui anogo aika lir külen Maya Store ki kibur jagi mi agi rungsaba aser injang tarakji yanglushia ki asütsü merüktetdang Tekayangchet rongseta asüba temangji January 25 nü 1995 nungang angu.

Korazüng: Kilingmen nung Karazüng aser tebutü Esther ya aikati nükshiba kibong tajung ka liasü. Tena takatait mesüra tashitemetet nung masü, saka par kibong ya Tsüngrem meimba kibong ka. Tena jabaso ka Moaaküm par asem peon itasen jagi tenük sünga aser pelaa ali. Anogo ishika tsungda nung Moaaküm tenu ka asotsü tepela anogoji yongyaa ali. Korazüng ya Allahabad Bank nung peon inyaker, itasen tila süaka par nungdak ajak peria tepela nung liasü.

December 26 nikongdang tebutü Esther tenati paper ka nung tanur asodang agitsü nungdaktem züluden. Kibong nung züngsem tasen ka arutsü tepela aser temoatsüji tenati jangratema yongya kinü asoshi nungdaktemji züluden. Tanur asotsü nungtem nung ita ishika rizungdena aliba senji semer Korazüng December 27 anepdang dokan-i ao.

Korazüng aji oda kidang nungi ayazükdang pai tebutü dang "Moaba tetsü ni aritepa dang



shishir kidangi shilangtsü" ta ashi aser kima nungi tebuttsü verandah nung noktaka aliba dakji meyiper anaben tashi repranger pila. Ibaji Esther-i la tebuba tejak anguba tatembuba liasü. Kechiyong Korazüng kidangi meyipa maru.

Injang aser bomb yokba ola anen, ki arungba misem remsepba ao saka tebuba Korazüng kidangi mashilang. Yimdong nungji tasü mang ka lir ta angashidang asüktema ajeb. Saka temangji Moaba tebu masü. Army-i pur oa lira ta osang agitep, saka parnok ket nung mali. Moaba tenu asodang agitsü nungdaktem züludena itemji alitsü aoba kidangi memeyip. Esther tanur asotsü anasaba anasaba aru; lai Moaba dak azüiter jeba sarasadem. Aser Moaba o tenu na tebu malir alalongtet kümogo ta yimdangi ait.

Tetsür ka tanur asotsü shisabulu khuret agi nenet dang kinungpur dak süngzükbateka mali. Iba nikong dang kiyonger ka khen ka khen ta lar ki ajanga ait dang shinga daka lai teimla jakden mangu. Anogotem süia aodang la nusotsü mapang atong. Kinü asoshi tebu osettsüset alitsü aoba meshilangjungi, tanurji aso. Tetsür chanu ka January 21 nü 1995 aso. Kinü tanurji sangwasangwar tajinütsüka, saka mulung shirangba tetsü dak rangloksü

mokoki aser kechi o jembitsü tebang nungi madokteti ni la semdangba bilemteter. Iba kaket züludang ni Esther November 3 nü 2015 nung ajurua jembidang, tejen otsü jagi küna nüktzü mesotetti liasü. La zürep a liba anogo nungji Bendangnükshi kü nati la semdangba lai mamai inüji ashi.

Moaaküm tenu tetsür chanu kaji January 21 nü 1995 nung aso aser tebuba Korazüng iba tashi nung kidangi maru. Kodang Maya store kibur jagi kiji yanglushitsü merüktet idangji nisung ana rungseter aliba January 25 nü 1995 kaktet. Ya Tekayangchetba aser Korazüng liasü. Tanur sor anogo pezünübuba nung Esther dangi tebuba tasü mang bener aru. Meimchir otsü nung iba ama taku marok ya aika mali.


Talitemjen: Longsa Baptist Arogo nung Chowkidar Talitemjen, December 27 anep dang chiyungya alidang iba anep dangji Longsa busji tera karaa Mokokchung-i alutsü 'horn' agütsü. Akümli nung tatembangbuba chi chiyonger ta memeteti, ausoji temdaka yutsür tapusoi par jabaso dang, "Obala yakta atutsü. Aser obai metai aser amsang tapu tapu alir atutsütsü" ta shir kiküm ayazükbaji par jabaso asoshi tebu tatembang ola liasü.

Talitemjen ya Repawati jabaso tambusang liasü. Pa tebuttsü Imwatila den jabaso ana toktsür 1994 küm December 27 nü Mokokchung town yimti tiyong nung Indian Army-i kaseta asü. Talitemjen lanuwa nungi pa teka agi kongshiba tesangra sempetji Tsüngremi agütsür liasü. Pai Sewing Machine, Rice Mill, generator aser yamala electronics mapa inyaka yanglushiba nung yimer yari. Yamala mapa nung pa tesangra liasü. Yimdak generator ka tera raksaba yanglushitsü 'parts' alitsü inüji pa Mokokchung-i aruba liasü. Pa town tiyongtsü nung lishia injang aikati pa temang nung rema aka aser idakji ontaka laoa asü. Saka pa ya shiba shingaia meshitet. Town Committee aser Red Cross nungi iba nisung shiba metettsü (identity) kanga merang dang. Saka shingaia meshitet. Ni oa raprang dang nung pa temang nungji injang aikati akaba zübu liasü. Temang kanga mejungi kasaba ka, kibur mali nungji joko kanga menur külen timtem tulu agia tasü mangji town committee-i arem.

Nikong dang Mokokchung nungi meyipa atuba bus meita ata, saka Talitemjen matu. Tebu o mamai par jabasoi, "Oba kodang atutsü" ta asü ng dangba tetsüi kodanga mamateter ta ashi. Tesülen Mokokchung nung nisung kasetba osang angashi nung anogo

asemnübuba nung kinunger kar tsü ngdong alua osangji agitep nung Police station nung pa tola aser tsü ngsem yua aliba nungi Talitemjen asüba kuli tejangja angu. Anogo ishika süir külen pa tasü mang noksa agiba nungjagi kuli tabensa aküm.

Sentep tsü ngtsü ng ola angashiba shia Arogopur mulungjang nung kongshi. Tsü ngtsü ng olaji Imwatila asoshi nüktzü osang ka! Honibar aonung, Bodhbar aonung aser Deobarnü tsü ngtsü ng ola jagi la süktema jebdaksü. Deobar-nü shia tebu tsü ngtsü ng temer tenla kidang ataa aliba ajurutsü tanurtem yongya. Honibar aser bodhbar aonung sentep tsü ngtsü ng temer külen tebu arutsü yimlaa tanur jagi memejangi atali asü. Atangji alima nung tatembang o mejemii dang taküm tembangba taku marokji kodanga meshilutet. Imwatilai asür den pila sentep nung "teret dang süaka, mitsü dang süaka ki tonga arura peladima. Saka nibo koda!" ta ashidang aikati pei tenük nungi nüktzü mesoetteti ajeb. Tepila o makai tembangba aser ki tonga maruba temang ka asoshi tepila sentepji koda taku.



TASÜNGDANGBA

Süngden



?

Q1. 1. Aruya aliba 2023 AKM lokti senden nung AKM mendenpurji tetsüri anir shim nunga koma süla?~ Akang Imchen, Kohima

Ans: **Nüngtet Luden (Nominating Committee) ajanga tetsüra dena shimtsübaji AKM temzüng nung tenokdangba kecha mali.**

Q2. Naga nungeri kechiba World Cup football nung Argentina ya yamai keta asener? ~ Alemla Imsong, Mokokchung

Ans: **Na koba limai oaka idakji asenok sorubangro mesüka aliba nisung dakji mulungajem shisa kati repranger. Argentina dang masü saka Naga nunger soru mesükba kin Japan aser Korea nungerjia asenoki adianu ama repranger aser sapur.**

Q3. 3. Aor kidong komasür paikati aküm? ~ Shilu, Mokokchung

Ans: **Asen dang masü, saka tanga**

kina parnok rongnung kidong aikasa lir. Tatishitsü agi Assam nungera kidong metsüdak tema lir. Aji oda asen kidanger Sema aser Lotha nungera kwi lir bilemdangang.

Q4. 4. Dr. T. Ao- anir India nunger Olympic nung football asayadang koba kin den goal kwi agi makok? ~ Temshi, Kohima

Ans: **France den asayadang 2-1 agi makok.**

Q5. Alima nung arogoji kotak temaitsü lir. Alima arogo nung benshiba kechisa kotak nung mamshitsü? ~ Merang Jamir, Dimapur

Ans: **Tenla meshiba "Envelope" alemba ya kotak nungbo malitsü.**

L

Lenjeteri Tasüngdangba Süngden nüburtem dangi bener arur. Tazüngertemi question asüngdangnüba mashi ka asüngdangtsü akok. Tan ita pungu adoker aser tajungtiba ka shimteta Lenjeter copy ka angati agütsütsü. Tasüngdangeri pei tenüng den address tejangja zülur Whatsapp ajanga yokangma: **8257029272** TS 0026

NÜKTI RONGBANG

(The Journey of Mokokchung Town)

2nd Edition

T.Senka Ao

Outlets:

Kohima: Woodland Handicraft opp. State Library
Mokokchung: Students Book Centre, Balaka Yokya
Changtongya: Classmate

Also avialiable

at the

amazon

TERONGJEN SABI

(An Educational Love stories in Ao)

L. Samuel Pongen

Avialiable at the

amazon

Contact no. 8974086111



OLIVE MUSIC ACADEMY CHANGTONGYA TOWN, MOKOKCHUNG

Presents **AN OPEN AIR WINTERY GIG 2**

 **23** DECEMBER  **05:00 PM**  **AKM HALL,
CHANGTONGYA**

₹5K CASH FOR A
Lucky Winner

**LIVE
MUSIC**

**FAST
FOOD**



MEDIA PARTNERS

SUPPORTED BY

 Lenjeter

 Tir Yimyim



FOR DETAILS CONTACT
 8119024395